


ውቁል ወፍድ ኤረትሮፖ ልእከት ርኢስ ኢሳይያስ ዲብ ርኢስ መጅልስ ሰያዲ ሱዳን አብጽሐ



ርኢስ ኢሳይያስ እንዴ ሐመድ፡ ናይ ክርስ ወበረ መሻክል ምንመ ሀሉ፡ ለሓላት ገበይ ራትዐት እንዴ ጸብጠት ዲብ መርሐለት መዐደዩት ሰርግልት ለለአበጽሕ እትፋቅ ፋይሕ እግል ልሰርገል ልትከደም ከም ሀለ ሸርሐ።

ክኢቶም ለጅሃት፡ እብ ተውሳክ፡ ዲብ ዕላቃት ክልኤ ለጀሀት ወተጠውራት መንጠቀት ህድገው። እሊ ክእነ ዲብ እንቱ፡ ውቁል ልኡክ ኤረትሮፖ ምስል ናይብ ርኢስ መጅልስ ሰያዲ ሱዳን ጀነራል መሐመድ ሐምዳን ደግሎ ወወዘር ማልየት ዶክተር ጅብራል እብራሂም እንዴ አማሕበራ፡ ዲብ አደቀቦት ዕላቀት መዓወነት ወሽራኩት ክልኤ ለጀሀት ህድግ ወደ።

ዲበ ህድግ ሰፊር ኤረትሮፖ ዲብ ሱዳን ኢሳይያስ ዲስ አሕመድ ዲስ ሓድር ዐለ።

እብ ወዘር ካርጅየት አሰይድ ዐሰማን ሳልሕ ወንምያይ ርኢስ ኢሳይያስ የማኔ ገብረኣብ ለቁመ ውቁል ልኡክ ሕክሙት ኤረትሮፖ፡ ማሌ ዮም 11 ኣብሪል ልእከት ርኢስ ኢሳይያስ አፍወርቂ ዲብ ርኢስ መጅልስ ሰያዲ መዐደዩ ሱዳን ጀነራል ዐዱልፊታሕ

አልቡርሃን አብጽሐ። ልእከት ርኢስ ኢሳይያስ፡ ሱዳን እብ ማርሐት ጀነራል አልቡርሃን፡ ሱዳን ሱዳፊ ለሀለ ናይ ስያሱት፡ እቅትሳድ ወአምን ተሐድያት እግል ትትዐደዩ ከም ትቀድር ደማነት ኤረትሮፖ ለተአክድ ተ። ርኢስ አልቡርሃን ተአዩድ

መ/ወ/ሸ/ደ/ኤ/፡ ዲበ ሐልፊት ሰነት ሐድ 5 አልፍ ሻብ ምህናት አድረሰ

ማሕበር ወጠን ሸባብ ወደረሰ ኤረትሮፖ፡ መሻክል እቅትሳድ ወእጅተማዕየት ለቦም ሸባብ፡ ምህናት እንዴ ከሰበው መቅደራቶም እንዴ ጠወረው ዲብ ድዋርም መሰል ተቅዩር ወካድም እግል ልግብኦ እበ ኤተነዩ በራምጅ፡ 4አልፍ ወ 800 ሻብ ምህናት ከም ደርሰው ሸርሐ።

እተ ማሕበር መስኡለት መታብዐት አቃሊም አሰይደ ሄለን አሚኔ እግል ኤሪነ እተ ሀበተ ሐብራ፡ ለደርሰው ሸባብ ተዋብ ንህብ፡ ደወርህ፡ ጀላል ጭገር፡ አሸቃል ከላት፡ ኤሌክትሮኒክስ፡ ከሀረበት፡ አትሰናይ ክጡዋ ማይ፡ ቴክኖሎጂ ኮምፕዩተር፡ ተሰዊር ወኤዲቲንግ ሺድዮ ከምስል ከምክም ሐበረት።

መቅደራት ዲብ መአሰሳት ሕክሙት ለህለው ሸባብ እግል



ትዕቢ፡ እብ መዓወነት ምስል ምሓብር ወጠን ሸቃላ ወአንሳት እበ ትክክመት በራምጅ ተእሂል፡ ሴዕ ወርሕ ለኣተላላ ዲብ መጃላት መሲቀት፡ ሰሰዒት፡ ድራሙ፡ ንዛም ክርን፡ አትሳናይ ኮምፕዩተር፡ ህግዩ ዐረቢ፡ ቴክኖሎጂ ኮምፕዩተር ወብዕድ ለረከዘ ተእሂል ከም ተሀዩበ አብርሀት።

እምበል እሊ፡ ዲብ ኩልያት

ለህለው ሸባብ ዶርም ዲብ መጅተማዕ እግል ለዓቡ ለሰዴ ወበራምጅ ተእሂል ከም ትክክመ ለሸርሐት አሰይደ ሄለን፡ ምስል ውቅል ልጅነት እበ ገብኦት መዓወነት ፈሀም ወፈዛዐት መዋጥኒን ዲብ መዳፍዐት 'ኮቪድ-19' እግል ልዕቤ ዲብ ክሉ አቃሊም አትፋዝያት ከም ትሰርገላ አትአመረት።

እት ደንገበ አሰይደ ሄለን፡ ሸባብ ራክባሙ ለህለው አብነት እብ ዋጅብ እንዴ ትነፍዐው እብ፡ ለሳድፍ ተሐድያት እግል ልትዐደው ፋዝም እግል ልግብኦ እንዴ አትፋቀደት፡ ክለን ጅሃት መጅተማዕ እት ልትዓወነ ዲብ ሸባብ ረኣሰ ማለን እግል ልክሰኦ ትፋኔት።

አከዶት መንገፎ እጅትማዕየት ናይ አውለውያት አውለውየት

አከዶት መንገፎ እጅትማዕየት መዋጥኒን ናይ አውለውያት አውለውየት ሰበት ተ፡ እብ ተአስትህል ልትከደም እተ ክም ሀለ እት ውዛረት ዐመል ወራዐዮት እጅትማዕየት ሙዲር ዓም ቅስም ራዐዮት እጅትማዕየት አሰይድ ምሕረትኣብ ፍሰሃይ ሸርሐ።

እት ሰነት 2021 እብ ሰበትለ ትሰርገላ በራምጅ እግል ኤሪነ እተ ሀበዩ ሐብራ፡ አሰይድ ምሕረትኣብ፡ እግል 459 ዩታይም ለረፍዐ 131 ዓይለት እብ ዓመት እብ ዝያድ 1.3 ሚልዮን ነቅፊ አትሐደሮት ክም ገብኦ፡ ወ1170 ምስል ኤች.ኢ.ይሺ ለነብሮ አጀኒት እብ ዝያድ 5 ሚልዮን ነቅፊ መትነፍዐት ሙነት ወዕምር ለወሰክ ደወ ክም ገብኦው አብርሀ።

አጀኒት እብ ሰብብ መሻክል እጅትማዕ ዓም ዐግሎ ተዐሊም እግል ኢልከረሞ፡ ዲብ አቃሊም ዐንሰቤ ግብላት፡ ጋሽብርኩ ቅብለት በሐር ቀየሕ ወግብለት በሐር ቀየሕ እግል 4,850 አግሩዝ ሰዓይት ኣላት ምህር ክም ገብኦት፡ ወ7 አጀኒት ዩታይም እብ ሸክል ውላድ ዋብ ዲብ እብ ምራደን ለለዓብዩ ዓይላት ወ4 ህዩ ምስል አቃርቦም ክም ትሓበረው አፍሀመ።

እግል ዓይላት ሹሀደ ለትገብእ ሰዓይት እበ ከሰስ አሰይድ ምሕረትኣብ፡ እት ሐድ 62 አልፍ ዓይለት ሹሀደ ዝያድ 227 ሚልዮን ነቅፊ፡ እት ዐድ ወካርጅ ለህለው መዋጥኒን ለትበርዐው ዝያድ 2.1 ሚልዮን ነቅፊ እብ እዳራት እግል ልትሌለዩ 343 ዓይላት ሹሀደ ግድዓት ከም ትካፈሉ፡ ወዝያድ 48 ሚልዮን ነቅፊ እግል 4,515 ሐን መራዐየት ለህለው ምስኩናም ሐርብ ከም ፈግረ ሐበረ።

አሰይድ ምሕረትኣብ እንዴ



አትሉ፡ ዲብ አቅሊም ጋሽብርኩ ምዲርያት ጋሽብርኩ፡ ባርንቶ፡ ገሉጅ ወሰነይ ዝያድ 500 አንሳት ለብእቶም 1,251 ግድዓም እብ ካሮ፡ ዲብ አቃሊም ምግብ፡ ጋሽብርኩ፡ ዐንሰበ ወቅብለት በሐር ቀየሕ ህዩ እግል ዝያድ 304 ዓይላት ግድዓት እብ ዝያድ 3 ሚልዮን ነቅፊ እብ ትጃረት ወንዋይ ከም ሐድረው አፍሀመ።

እምበል እሊ፡ ዲብ አቅሊም ምግብ 29 አንሳት ግድዓት ጀላል ጭገር፡ ነሲጅ ወክያጠት እንዴ ደርሰዩ ለሐድረ ዲብ ህለዩ፡ እት አቅሊም ቅብለት በሐር ቀየሕ ህዩ 51 አንሳት ግድዓት ምህናት ሲንጀር ወአግቡይ ሸቅየት ነብረ ደርሰ ከም ህለዩ አብርሀ።

ዲብ ውዛረት ዐመል ወራዐዮት እጅትማዕየት ሙዲር ዓም ቅስም ራዐዮት እጅትማዕየት አሰይድ ምሕረትኣብ ፍሰሃይ እት ደንገቤ፡ ዲብለ ትፈናተዩ ድወል ለነብሮ አንፋር መጅሙዐት ፓልቶክ 'ኢ.ፒ.ኤል.ኤፍ - ህግደፍ ሺዥን ሩም' ላቶም ኤረትሮፖን ዲብ ክልኤ ደርበት እበ ነድአው ሐድ 4.4 ሚልዮን ነቅፊ፡ 91 ዓይለት ሹሀደ ምስኩናም ሐርብ ምሕርበት እግል ልሕደረ እቡ እንቡት ከም ሀለ ሸርሐ።

ዶር መድረሰት ሙሲቀት አስመረ ዲብ ረበዮት ሙሲቅዩን

መድረሰት ሙሲቀት አስመረ፡ ዲብ ረበዮት ሙሲቅዩን ሐዳይስ ወጠወሮት መቅደራት ገዳይም ዶር ትቀድም ከም ህሌት ሙዲርላ መድረሰት አሰይድ ኤልያስ ወልደገብርኤል ሐበረ።

ምስል ኤሪነ እተ ወደዩ መቃበለት አሰይድ ኤልያስ ለእብ ደረጀት ሻሃደት ወዲፕሎም እብ

ፍዕል ወንዘር ለልትህዩብ ምህር፡ 8 መጃል በሀለት ኦርጋን፡ ጌታር፡ ሳክሰፎን፡ ክላሪነት፡ ፍሉት፡ ሻዮሊን፡ ድራም ወቤዝ ጌታር ከምስል ከምክም ሸርሐ።

እት መርከዝ ተእሂል ሙደርሲን ከም ክፋለ ልትህዩብ ተእሂል ናይ ሰነት ድራሰት ሙሲቀት ለነሰአው ሙደርሲን፡ ዲበ ትየመመው እቱ መዳርስ ለአድርሶ እቡ ከም ህለው

ለሐበረ አሰይድ ኤልያስ፡ ምን ፍርቀት ዓዳት አሰር ለተሐረው አጀኒትመ አምሱይ ዲብ ደርሶ ናይ ሰለስ ሰነት ድራሰት ከም ነስኦ አብርሀ።

እምበል እሊ፡ ምን ሰነት 2016 ዲብ መዳርስ ተክኒክ ወምህናት ምን 10ይ አሰክ 12ይ ፈሰል እግል ህለው ደረሰ እግል ልድረሶ እበ ፈግረ በራምጅ፡ እብ ደረጀት

ሸሃደት ለትድሐረው ከም ህለው እንዴ ሐበረ፡ እግል ደረሰ 8ይ ወፃይ ፈሰል ሰነን አስመረ ወድዋራሙ፡ ዲብ ወክድ ዕርፎም ናይ 4 ሰነት ድራሰት ከም ተሀዩበ አትአመረ።

እት ሰነት 2019 ለትድሐረው ደረሰ ዲብ ፍርቀት ማርሻት ወጠንዮት እንዴ ትየመመው፡ ሸቁ ከም ህለው፡ ቀደምም ዲበ ፍርቀት ለትወዝዐውመ ለመድረሰት

ለአፍራቶም ከምቶም ለሐበረ አሰይድ ኤልያስ፡ እትሊ ወክድ እሊ እብ ሰብብ ገሸለት 'ኮቪድ-19' እዱጋም ለዐለው 55 ደረሳይ ደርሶ ከም ህለው ሸርሐ።

እት ሰነት 1994 እብ ዕልብ ሐድ ክድመት ለአንበተት መድረሰት ሙሲቀት አስመረ አሰክ እለ ሐድ 300 ደረሳይ ከም አድሐረት ወሳይቀ ለሐብር።



ዐውቴ ርያደት፡ ፍገሪት ሩእየት ዋድሐት ወጅህድ ድቁብ

እተ ለሐልፊዩ አሌላት፡ ኤሪትሪያን መትባድረት ዲብ ቃራት አፍሪቀ፡ አሮብ ወክሎ እተ ለገብአ ለትፈናተ መጃገራት ርያደት እብ ለሰጀለው ዐውቴ፡ መንዴሪት ኤሪትሪያ ምን ሰናተ ዲብለት ወቀለት ርሽመት ሕሽመት እንዴ ተአምበልብል፡ ነሺድ ወጠን ኤሪትሪያ መ እብ ክርን ውቅል ትቀደመ።

ዲብ ሽርም አሺኽ መሰር እተ ለገብአት 18ይት ሻምፕዮን ብድረ ዐጀላት አፍሪቀ ሰነት 2022 ዲብ ለሻረክ ፈሪቅ ወጠን ብድረ ዐጀላት ኤሪትሪያ፡ 7 ናይ ደሀብ እብ ለልትረከብ ዲብን 15 መዳልየት ምን ሰናተ ላተን ድወል እንዴ ትወቀለ ልትዐወት እንዴ ሀሌ፡ ነፈር ፈሪቅ ወጠን ኤሪትሪያ ላቱ መትጃግራይ ሄኖክ ሙሉብርሃን ህይ፡ ሐየት ጅግረ አፍሪቀ ሰነት 2022 እብ ግብአቱ ዐውቴ እብ ጨመራት ቱ።

ዲብ አሮብ እድንያይ መትጃግራይ ዐጀላት ቢንያም ግርማይ ህይ፡ ዲብ በልምጃም እብ ደረጀት ዐለም እተ ለገብአት ጅግረ እብ ለአርአየ መቅደረት ውቅል ወኪመትሐላል፡ “ዲብ ዐውቴ ለበጽሐ ናይ ሰልፍ አፍሪቃይ” ትበሀለ። ዲብ ብድረ ዙር ታይላንድ ልትጃግር ለጸንሐ መትጃግራይ መትከል እዮብመ ሰሜቱ ወሰሜት ወጠኑ ለአሰሜት ዐውቴ ሰጀለ።

ዲብ ብድረ እብ ሰዐይመ መትባድረይት ናዝሬት ወልዱ፡ ዲብ ግብለት ኩርየ እተ ለገብአት እድንያይት ጅግረ ማራቶን፡ ሰለስ ደረጃት ሐዳይስ ትሰጅል እንዴ ህሌት፡ ኤሪትሪያይት መትባድረይት ራሄል ዳንኤል ህይ፡ እብ ደረጀት ዐለም ለሔሰት ወለት አንሰይት መትባድረይት ጅግረ እት ከደን እንዴ ትበሀለት ተሐራት።

እሊ ለለሐብን ዐውቴታት እሊ፡ ሐቱ አማን ለአክድ። ክም ነፈር ወሙአሰሰት እተ ትከድም ዲብ ወቅት፡ እብ ሩእየት ዋድሐት እንዴ ትመረሕኩ፡ ሀደፍከ እንዴ አከድከ እብ ሕሽመት ሽቅል ወገለድ ሳብት እብ መትሰባል ምን ትከድም፡ ዐውቴከ ላዝም ተ። እሊ ዐውቴታት እሊ መብዳእ ሳብት ለቡቱ። እተ ለሐልፊ ዘበን ክልኦት አጅያል አረትርዩን ሸባብ ዌርሰት ተእርክ ድድ ኩሉ ዐዳዋት እንዴ በዋረው ሰቢቶም፡ መጥመጦርለ መዳፈዐት እግል ሰያይት ወጠን፡ ዲብ ለትፈናተ በርናምጅ ዐማር እንዴ ትፈረረው፡ ለሰጀለው ዐውቴታት፡ አሳስ ወጠን ድቅብት ወሰአየት መስተቅበል ዲብ ወቲድ ተዐወተው። ለዲብ ጅግረ ርያደት ልትረኤ ለጸንሐ ዐውቴታት ህይ፡ ክፋል ናይለ እግል ኩሉ መታክል እንዴ ክህለ እብ ዐውቴ ገጽ ቀደም ለለአተሳድር ነባሪ ወዓዳት ሸባብ ኤሪትሪያቱ።

ሪኢስ ኢሰያስ አፍወርቂ፡ ዲብ ሰነት 2015 መትጃግረት ዳንኤል ተኽለሃይማኖት ወመርሃዊ ቅዱሳ፡ ዲብ ብድረ “ዙር ፈረንሰ” እግል ኤሪትሪያ ወድወል ቃረት አፍሪቀ ተእሪክ ሐዲስ እንዴ ሸቀው ክም አቅበለው፡ ዲብ ዴዋን ሕኩመት እተ ለገብአት እግሎም ከብቱ ዲብ ለአሰመዐዩ ከሊመት፡ “ኤሪትሪያ ዲብ እድንያይ መጃገራት መሻርከይት ሌጠ እንዴ ኢትገብእ መትጃግረይትመ ክምሰልተ እብ ፍዕል ርኡይ ሀሌ። ሰበት እሊ፡ ሐቆ እለ ምን ኬን አፍሪቀ እብ ደረጀት ዐለም ክም ንትዐወት እግል ንሕሰብ ወነኤትን ወጅበን” ለትብል ርሳላት ክብድት እትሕሉሉፍ ክም ዐለ ለልትዘከርቱ።

እላተ ህይ፡ ለሀግዩ እብ ፍዕል ለትትረኤ ዲብ መርሐለት ትበጸሐት። ለርክብት ለህሌት ዐውቴ እንዴ ተሐፈዘት፡ ደማነተ እግል አከዶት ወአተላለዮት ላኪን፡ መስሉልየት ዐባይ ለለአረፈዎቱ። ለዲብ ሕዱድ ወራታት ርያደት ወእብ ፍንቱይ ዲብ ብድረ ዐጀላት ወብድረ እብ ሰዐይ ርኩብ ለህለ መክሰብ፡ እንዴ ፈይሐ፡ ምንኬን መሻረከት፡ ለትወቀለት ዐውቴ ክም ትትረከብ ረኢሱ ቀደም እግል ልሰነድ ሸቅል ድቁብ እግል ለአትሐዜቱ።

ለትወቀለት ደረጀት ዐውቴ እግል ንብጻሕ እብ ማዕጸም ወመትሰባል ኩዲም ለአትሐዜ። ሰበት እሊ፡ ክም መጥዋኒን እተ ለትበገሰን ዲብ ወራት፡ እብ መትሰባል ወኤማን ከዲም ወሀለየት እዳረት ብቅዕት፡ ዕላመት ተእሪክነ ወታክያት ዐውቴ ክምሰልቱ እንዴ አመርኩ፡ እብ ዕጹፍ እግል ነአውቄ ወለረከብናህ ዐውቴ እግል ነአድምቀ ብኩ።

ጸረተርሃዊ ጸሐፊ

ክል አርቡዕ ለትጠ'በዕ ጀሪደት

መዳልያይ፡-
መሐመድ እድሪስ

ለይአውት ወአርትዖት
* ዘህረ ዐሊ
* ፋዋን አድም

ተለፎን፡ 121797/07121322
ፋክስ፡ 127749፡ ዕ.ሰ.ቡ፡ 247

ተውዝዕ ጀሪደት፡
ተለፎን፡ 200454

አትአመርኩ፡
ተለፎን፡ 125013፡ ዕ.ሰ.ቡ፡ 1284

ቅብለት በሐር ቀየሕ፡ ዝያረት ሓክመት አቅሊም ዲብ ምዴርያት ፈሮ ወገልዐሎ



ሓክመት አቅሊም ቅብለት በሐር ቀየሕ አሰይደ አስመረት አብርሀ፡ ዲብ ምዴርያት ገልዐሎ ወፈር ለህለ ከደማት እጅትማዕየት ወለቡቱ መሐገዝ እግል ትታይን ወሐል ለልትረከብ እቡ አብሳር እግል ትጅመዕ እት ዮም 7 ወ8 አፕሪል ዝያረት ወዴት።

አሰይደ አስመረት ዲብ ጀውለተ፡ መሕገዝ ማይ-ጽሩይ እዳረት ደዋዬሕ ባደ ሐል እግል ልርከብ ዲብ 2010 ለትሸቀ ምን ወሬሕ ጁን 2021 ሸቅሉ ዕጡል ለህለ ወእብ ጣቀት ጸሓይ ለሸቄ መሸርዕ ዲብለ በጽሐት ዲቡ፡ ለመሐገዝ ሐል ለረከብ እብ ገበይ

እብ ከሰስ ምስል ሰብ-መቅደረት ወእዳርዩን ሀድገት።

ዲብ ምዴርየት ፈሮ - እዳራት ደዋዬሕ ኢራፋይሌ ወገደም-ላዜን እብ ወሐይዝ ለትደመረት ብንዩት-ተሕትዩት መሸርዕ ማይ ወእንዴ አምቡተ ለኢተመ በራምጅ ሐቀለ ረኤት፡ አሰይደ አስመረት፡ ዕጡል ለህለ መሻሬዕ ለለሐሶሴ እቡ፡ ወለትደመረት ብንዩት-ተሕትዩት ለትሰኔ ወለትትበደል እብ ገበይ፡ ምስል ለከሰሶም ጀሃት ትጋሚት።

እምበል እሊመ፡ ዲብ ምዴርየት ገልዐሎ ለህለየ መአሰሳት ዓፍየት ወተዕሊም ለበጽሐት ሓክመት

አቅሊም ቅብለት በሐር ቀየሕ፡ ለበንቱ መሓገዝ ሐል ለረከብ እብ ገበይ፡ ምስል እዳርዩን ወመደርሲን ሀድገት።

አሰይደ አስመረት ዲብ ጀውለተ፡ ምስል ዐበዩ-ዐድ በደ ወዐዳይቶ እትለ ወዴቱ ህድግ፡ ሸዐብ እንዴ ትነዝመ ወመቅደረቱ እንዴ ነዝመ መሐገዙ እግል ለአርሄ መባደረት እግል ልንሰእ፡ ዶር ዐባዩ-ዐድ ዲብ ሸነት ኤዝየት ላቱ ለመድ፡ ክምሰልሁመ ዲብ ሐርሰ እግል ልትጠወር ለቀድር ወራታት ሀድገት ምስሎም።

ሰካን ሐምበክተ ምን ትከምከመ ከዳማት እጅትማዕየት ረክበ

ሰካን ናይ ምን ምግብ ምዴርየት ሰልዐ ላተ ርከብ 161 ኪሎሚተር ራትመት ለህሌት እዳረት ደዋዬሕ ሐምበክተ፡ ዲብ ምግባይ-አካን ሰበት ከምከመው፡ መስኩብት ለበ መናበረት እግል ልምርሐ ወአሳሲ ከደማት እጅትማዕየት እግል ልርከዐ ክም ሰደዮም ሸርሐው።

መናበረት ሰብክ-ወስግም መርሐ እተ ለዐለው ወክድ መሐገዝ ብዞሕ ክም ዐለ እግሎም ለሸርሐው ለሄይብት ረኤይ፡ ምን ሰነት 2017 ላኪን ሰበት ትከምከመው፡ አሰክ እለ ከደማት ተዕሊም ክም ረክበው ወመሸርዕ ማይ-ጽሩይ ልትሸቄ እግሎም ክም ህለ አፍህመው።

ለትበኔት እግሎም መድረሰት መአምብታይት እብ ዋጅብ ልትነፍዖ እብ ክም ህለው እንዴ

ሸርሐው ህይ፡ ለነብሮ ዲቡ ድዋር ምን ምግብ እዳረትለ ምዴርየት ለቡቱ ሪም ዲብ ወግም እንዴ አተ፡ ዲብ ምግባይት-ደረጀት ለተዐቢ እቡ ሐል እግል ልትረከብ፡ ክምሰልሁመ ታርፍ ለህለ አሳሲ ላቱ ከደማት እጅትማዕየት እግል ልግባእ እግሎም ጠልበው።

ኣሊ ክእነ ዲብ እንቱ ዲብ ምዴርየት ሰልዐ፡ ወራታት መዐየ ለአሳሱ ነዳፊት ቀነብያት እንዴ ተአክረ ምንመ አስተብደ፡ እብ ፈድል ጅህድ-ሕበር ናይ እዳራት፡ ወካይል ሸዐብ ወመአሰሳት ዓፍየት መትቀዳም ሰኔ ክም አምጽአ ተሐበረ።

ዲብ ፈሬዕ ውዛረት ዓፍየት አቅሊም ጋሽ በርከ በዐል-መቅደረት ዓፍየት ድዋር አሰይደ ተኽሎም ዩዕቡዩ፡ ለምዴርየት - ምስለ ህለ እለ ጂኦግራፍያይ መካሪት ወጅንሰ መናበረት

መጅተመዕ፡ ፈዕልየት መዐየ ለአሳሱ በራምጅ ነዳፊት ቀነብያት መጋብህት-ብዞሕ ምንመ ቡ፡ እብለ ገብአ አትፋዝያት ፈሀም መጅተመዕ ሰበት ዐቡ፡ ዲብ መደት ሐጫር፡ እት ኩለን እዳራት ደዋዬሕ እግል ልትፈዐል ክም ቀድረ ሸርሐ።

ምዴር ምዴርየት ሰልዐ አሰይደ ውኤለ መሐመድ ዐሊ እብ ጀህቱ፡ መዐየ ለአሳሱ ነዳፊት ቀነብያት ዲብ ዳፍያት ለለዐዴ ሕማማት ፍገራት ሰኔ ሰበት ቡ፡ እዳረትለ ምዴርየት ለበርናምጅ እግል ልትዐወት ርሒብ በርናምጅ አትፋዝያት ክም ገብኤ፡ ፍገራት ናይ እሊ ህይ፡ ለበርናምጅ ዲብ እዳራት ደዋዬሕ ርከብ፡ ሕሩም፡ ዴባሳታ፡ ሓምበክታ፡ ግርግር-ገርሲ፡ ባድን-ልጊተ፡ መርበባዬብ፡ ጣሕራ ወሸርኢት እብ ተማመት ክም ትሰርገለ አብርሀ።

ጽምድዬ ኢትንቀሊ! (8^ኛ ክፈል)

ልጅልቲ ሓላት እመ ሰበት አሰፈተ፡ “ነግሼይ ማማዬ ሕነ ውላድ አደሚ ጌገ ምስልነ ትከለቀ። ህተ ምንዲ ኢትገብእ ለአማን፡ ምን ጀነት እንዲ ፈገርነ እትለ አዜ እነብር እተ ለህሌነ እዲኑ፡ ወቀይነ እብ ጸገምነ ወኢተመ። እንቲመ ህዩ ዐውለ እግሉ ትጌጌኪ፡ ጌገ ትደፍዒ ህሌኪ። አዜ ህዩ ታርህትኪ እትዩ ካርየተ ህሌኪ፡ እውደቅ እበ ወእቅነጽ ጸርኪ ለቅለ ወዝንብኪ፡ አሰናይ እት ደሚርኪ እት እንቲ ናይ ዲመ ፍንቲት ኢመጽአተኒ። ሐውዬ ህዩ አሰኦሎቶም እቼ ሀለ” ትቤ ወምን ልበ አተንፈሰት።

ልጅልቲ መስኦልየት አሰኦሎት ሐው እምበለ ክሉ ለአምረ ብርሃና እግለ ዐባይ ሐው ምስጢር ሰበት ገብአ አግቡይ ቀፍረት። ክቡድ ጋር ክምስልቱ ህዩ ትየቀነት። ላሊ እለ አምዕል እለ ንግስቲ ሰካብ ዝያድ አርበዐ ሓል እግሉ ሰክበት። ዲበ እግሉ ድብድብት ለዐለት መስጠረ ወለት ርሕመ ሰበት አሻረኩት እብ እንቅዕራረ ሰክበት። ልጅልቲ ላኪን መስኦልየት አሰኦሎት ክብደት እተ መስለ፤ ላሊመ ክምስል አምዕል ሌሓተ ጸብሕ እግለ አቤት መስኪነት። ለሀ ሰክበት ወለሀ ተርሀት። ላመ እተ ሰክብ ዐለት ዐራት ወሸኪተ መስለ፤ ክምስል ወለት ዒዶ ትባለሰት ቀንጸት ወትገሴት ትከፊት ወዐርገት። ሰካብ ላኪን ክምስል በዲሩ ምስለ ኢትክለቀ ድግ ሀፈ። እት ደንገበ ልጅልቲ ለገብአ ምን ገብእ ቀደም ዕለቱ ወሳዕቱ ክምስል ኢገብእ ወኢተምም ተአከደት። ወእብሊ ሐዋመ ለአማን እግል ተአሰኦሎምተ ወህቶም ልትከቦተ ጎማተ ምስል አርወሐተ በትኩት። እመ ላኪን ክለ ሐያተ እት ቁሪነ ሸቀላት ወሀማት ትነብር ክምስል ዐለት ተአከደት።

ግድም ንግስቲ ወልጅልቲ እግለ ማጽአም ለየዐለው ወላድ ስምኦን ልክየ ወደየ። ሰሮም እግል ልምጸእ ቀድረ ሰሮመ እግል ልምጸእ እት ለሐዜ መዐደይ ሕዱድ ጸንሐ ወሰር ምን ሸቅል ሕኩመት እጃዘት ኢተሀየበው። ንግስቲ እት መጦረ ወለተ ባዋረት ሰበት ዐለት። እብ ሰደይተ እግለ ሐመደተ። ልጅልቲመ አክል አሕድ ክምስለ ናይ እማመ ምን ኢትገብእ ህታመ ሐቆ መስኦልየት ረፍዐት ላቱ ሰኒ ከብደየ ወቅላን አበየ።

አይወ ልጅልቲ ገሌ መናሰበት ምስል ዐይኖም ለተአትባልሰ

ምንዲ ትረክብ ሀሩር ከብደ እግል ተአፍግር ምን ልበ ተምኔት። ስምኦንመ እበ ምን ሔማሁ ወወድ እሙ ለሳደፈዩ ዋልም እት ትርሕም እቱ። ምን ተውሊደተ ወሐር ላኪን ምን ረአየ ቱ ወዋሰቱ ወእብ ዐቢሁ ደፍአቱ። ሰበት ሐረመዮም ለኢተአደምዕ መርገም ውሉድ ረግመቱ መስኪናይ። ህታመ ሐቃቱ ትብል እት ገሌሁ። እምበለ ሰሜት ስምኦን ምስል ሰሜተ ቅርንተ ለዐለት ካልእ ሐቱመ እብ ክሰሱ ስምኦን ለተአምረ የዐለ እግሉ። እብ ክምስል እሊ ህዩ፡ ምስል አቡህ ትባለሰት። “ደበ ሐቅክ ወዝንብክ እት ረአሰ ሐኩ ህለ። አይወ ሐኩ

ሐዳይ ወገብእ ምስል ዕበያትኒ። ላኪን ነሐረ ፈንኦ። ናይክም ፍርድ እትኪ ህለ ምንዲ እት በህል ወለት ርሕምክም እት አነ እብ ቀይሕ ከርት ወትዳገንኩክም ምን ሐያት እለ ዓይለት። እሊ ህዩ ልጅልቲ ምስል አርወሐተ ትብሉ ለዐለት ህም ገም ቱ። አማናቱ ልጅልቲ እት ስምኦን እግል ኢትትጸገዕ ዋሰቱ ኢተአምር ወምጣየቱ። እት ንግስቲ እግል ኢትትተንኩብ፡ ምን ለኢትጸበረቱ ቴለል ህቱ ሳደፈየ። እብሊቱ ለናይ አማን ፍርዶም ምን መንበሮ አከጅህ መትዳገናም እብ ቀይሕ ከርት ለሐፊት እበ።

ዐድ ስምኦን ግድም

ወእም እንዲ ገብአት ለዓቤቶም። አብሆም ምለዐል ምድር እት ሌሄርር እብ እቢ አበው። እበ ህተ ወዲቱ ሰኒ ሐዝነው ወገሀው እግለ። እለ አምዕል እለ ለአኬት አምዕል እት ፍንጌ ንግስቲ ወውላደ እት እንተ ህታመ እበ ትሰጀለ እተ እቢ አሕድ እት ሸኪ አሰርለ ሓዋተ ለሐልፈየ ክባበይ ገበአት።

እግል እሊ ሕቦዕ መስጢር ልተደገም ዐበዩ፡ ዕጋል ወቅሸት ናይለ ዓኣለት ሓድራም ዐለው። እግል ዝያድ አርበዐ ሓል በርሀት ወአማን ለተሐረመ መስጢር እዝን ለገብአ ሔምያይ እግል ልብጸሕ ቀድረ። ልጅልቲ እግለ ምን እመ ስምዐተ አማን እተአሰኦል። ንግስቲ ላተ ሻክረት እት እንተ ትትናሰር ወዐለት። አርድ ወሰመ ምን አፍ ሕሊል ሾመት ጨበ እተ። እግል እሊ ተየልል እሊ ለስምዐው ሰብ ዐግሎ።(ቤስ መኣብ) ሚ ትብል ህሌት እት ልብሎ እብ ድንጋጽ በረግዕ ገብአው። “የሀው ሚ እንሰምዕ ህሌነ?” ክሉ ህዩ ምነ ትሰመዕ ህግየ እብ ገረግሙ ተራቀመ። እትሊ መሐበር እሊ ዐይኖም ለካይን እግል ልምጸእ ሉክያሙ ምንመ ዐለው ኢመጽኦ። ላመ ክል ዶል አማን እግል ኢትትገም

ቀይድ ወልጃም ጋብአት እቱ ለዐለት ዘየታት መደው ወቅል ዐለ።


አልምህም ሐቆ ክም ሕቤዕ ወስትር ለአማን አፍ እንዲ አፍገረት ህታመ ፈግረት ወትወለደት። እለ አማን እለ ሐቆ ሰዱድ መሐዋ ትወለደት። ንግስቲ ትትናሰር እንዲ ወዐለት እብ ክእኒ ለአማን ኖሰ እግል ትትገመ ትጀበረት። ሓይሰም ወቃልያም አቅሸት ክምስሌሁመ ዕጋል ሰብ ዐድ አበው ወሐው። ወእብ ፍንቲይ ወላጄ። ክልኤ እዲህ ለዐል እንዲ ረፍዐተን ምን ረቢ መቅፈረት እት ትትረጃ ምን ውላድ ርሕመ ወውላድ ዐደ ዐፎ እብ ክርን ሐዘነት ወረአሰ ዳንን

ክእኒ ትቤ። እንተ ካልቅ ምድር ወሰመ ዝንብዩ ወአከይ ፍዕልዩ ሕቦዕ ምንክ ኢትን ወስቱር ኖሰክ ሳምሐኒ’ ትቤ ወሐር እግለ ውላድ ዐይኖም ትም እንዲ ትቤ እግል ልጅልቲ ዳግመቶም ለዐለት አዜመ ኢሰትረቶም።

ላመ ሓድረም ዐለው አንፋር ገሌሆም እበ ሳደፈ እት ልትፈከሮ ሰሮም ህዩ፡ ብዲርነ እንሰምዕ ዐልነ ምን ዐይኖም ትወልድ ክምስል ዐለት እንዲ ቤለው። እት ለሀድጎ ልትሰምየ ዐለው።

ውላደ እብ ፍንቲይ ብሰራት ወሐበን እትለ አምዕል እለ እንዲ በጽሐው እግለ ዓቤቶም እሞም ምቀደሚሆም ግንሐተ አበው። እብ ውዳየ ሐሰረው ወከጅለው። ክም ምራዶም ምንዲ ትገብእ እግሎም አርድ እንዲ ትሰጠረት እግል ትውሐጦም ወየአበው። ክሉ እትለ አካን እለ ሓድር ለዐለ አዳም እብ ጭንብወ ክሉብ እንዲ ዐላቱ ሐቆ ገሌ ወቅት ላተ ውላደ እብ ብካይ ድንግሐ ወደው። መሳኪን ምን ሐቱ እም ወክልኦት አብ ሐያቶም ለህለው ሐው ለትወለደው ሐውቶም አይወ ውላድ ስምኦን ወውላድ ዐይኖም።

አይወ ሀለዮትነ እት እዲነ እግል ዶሉቱ እንድኮን እግል ዲመ ኢትን። ሐቆ ለተሐደደ እግልነ ወቅት ምርትክ ክእብ አምዕሉ ክባባይ ገብእ ምነ እለ ሐያት። ከእብሊቱ ወድ ሚን ኣድም ሰሩ ለለአገንድል ወለለኸሽንን ታሪክ ሐያት ለሐድግ እት ህለ፡ ሰሩ ላተ ክምስል እለ ትደገም ለጸንሐት ገብእ፡ ከዲብ ሐያት ትዕስ ወአድኖናይ ነብር። ላኪን ህቱ እብ አምዕሉ ናድም ውሓር ዲብ እንቱ አሰክ ኣሱር አከጀህ እንዲ ሐድገ አሰክ ቤት አማኑ ልሄርር። ንግስቲ እግለ ድብዱብ ምስጢረ እግል ተአፍግር ወምን ሔማህ ወተላክመ ዋልደቶም ለዐለት ውላደ ክል ምር ከአቡሁ እግል ኢተትአምሩ ላተ ለአማን እግል ኢተአፍግር እብ ዐይኖም ጋብእ እተ ለዐለ መኔዕ አው መሐልክ እግል ትሕለፋ ኢቀድረት። መስኪነት ንግስቲ ዐንዶም እግል ኢተትዐይብ ዲብ ትብል ኖሰ ተዐየበት። ወእበ ድብዱብ ምስጢረ ሰኒን ሓለፈት። ወለ አማን አደሐ ጸዐደ እግል ክሉ እንዲ ኢትደግመ ህዩ ሐዞተ እትለ እድዝየ እንዲ አውቄት ጎገ እንዲ ኢሰክብ እብ ውዲተ ታርሀት ወግህየት ዲብ እንተ ምን እለ እዲነ እት ሰነት 2021 ዳር አማን ቀደመት።



ወድ እምክ ወአቡኩ። ዐርቀይ ሐላሉ ግራሁ እንዲ ሐድገዩ ምልዐል ምድር እት ህሌክ እት መስኩብክ ናጸፈ። ለሸሪፍ ወንዲፍ ብላይክ ወሕሽመትክ ዲቡ ሕመቱ ዳከከ። እንታመ በሪ ይእንተ፡ ንግስቲ ምስለ እግል ኢትብጠር ወኢትሰነደ፡ ወለዘት ሻማትክ እግል ኢተአትዳውር መስኩብክ አሪምኩ። ሕናመ እበ ናይክም ሻማት ሕሽመት ወሐበን ወረኩብኩ። እብ ሐጫር ህግየ ሕነ ውላድክ ወሔመኩ። ሕላይ ወለሐን አብ ምስል እም ሰበት ሰእነ እትለ ሐያት ሀለዮትነ እተ ምህም ኢልትፊኤኒ። ክሉ ለሓሰል ምርተ ከሐዞቱ ምንዲ ነሰእ ምኑ ተቤኮ እት ረቢ ንግስቲመ ጌጋህ

ትጃምዐው። ልጅልቲ ወእመ እግል አሰኦሎት መዳሊተን አተመመየ። ንግስቲ ለክሰረ ብሹል መስል ገጸ ምስል መናበረት ሐገሌብ ወቀበ ከብድ ሕብሩ ቃዊ ምንመ ዐላ፡ እለ አምዕል እለ ላቱ ለውቀት ልትርኤ እቱ ዐለ። ልጅልቲ አግቡይ ሐያት እት ትትነፈዕ ለእግል እመ ሰበር እንዲ ገብአት ትትረአየ ለዐለት ሕሸክ እንዲ ኢትብል ወክሩክ አስመዐቶም ተ ለአማን። ህቶም በዲሮም ልክየ እሞም ደሐን ክምስል አለቡ እተ አምራም እት እንቶም ጸንሐው። ሐቆ እበ ሓሰለት ዐለት ስምዐው አርወሐቶም አማን መትከባተ እግሎም አቤት። እብ ፍንቲይ ህዩ እግል እሞም ለክምስል አብ

ግብለት፡ ዕልብ 20 ርቱብ እጅትምዕ ምጅልስ አቅሊም ወኤታን ሸቅል 2022 እዳረት አቅሊም ገብእ



ምጅልስ አቅሊም ግብለት፡ “ወጠንያይ ሕሸመት ወሰላም እግል አድመናት፡ ዲመ ዱሉያም” እት ሐንቴለ ትብል ሰቅራት ዕልብ 20 ርቱብ እጅትምዕ እት ዮም 7 ኣፕሪል ዲብ መዲነት መንደፈረ ወደ።

መሰኡል ምጅልስ መምህር ወልዳይ ገብሬ ዲብ አስመዐዩ ከሊመት፡ ብንዩት ትሩድ እቅትሳድ-ወጠን፡ አድመናት ዐዳለት እጅትማዕዩት፡ በራምጅ ገማል ወደሐን፡ ክምሰልሁመ አድመናት አምን ወጠን ወመስከብተ ምንለ ልትጸበሩን ለህለው ዐባይ-ቀድያት ክምሰልቱ ሐቀለ ሸርሐ፡ መሻረከት መጅተመዕ ዲብ ኩሉ አሸቃል-ወጠን እግል ትዕቢ ሊክ ቀደመ።

መምህር ወልዳይ እንዴ አትሉ፡ እዳረት አቅሊም ግብለት እትለ ሰነት ጎነ ለትሳወ ከደማት እጅትማዕዩት እንዴ ዜደ፡ ሳፊ ወራቴዕ ከደማት እግል ልትሀየብ

ለአመመ እግል አንፋር ፈሬዕ ብናእ-ዐማር ወእተይ ከርስ-ዐድ ለነዝመቱ ተእሂል አሀምዩቱ ውቅል ሰበት ተ፡ ዲብለ ብዕድ መጃላትመ እሊ ለመስል ተእሂላት እግል ልትዝም ኡትፋቀደ።

ሓክም አቅሊም ግብለት አሰይድ ሃብቴአብ ተሰፋጺን እብ ጀሀቱ፡ በራምጅ ብንዩት-ተሕትየት ሐርሱ ብናእ ዐማር፡ ከደማት እጅትማዕዩት ወወጀዶት ማይ-ጭሩይ እብ ለትወቀለ ዲብ ልትሸቂ ዲቡ ለጸንሐ ወራታት ዐማር ክምቱ እት ለሐብር፡ እብ ፍንቱይ ዲብ ቀድየት ተዕሊም ፍገሪት ሰኔት ለትትረከብ ምኑ ካድም እግል ልግበእ፡ እዳረት ምስል ሸዐብ ወአንፋር ምጅልስ እብ መትዓዋን እግል ትሸቂ ስታት ፋግር ሰበት ህሉ፡ አንፋር መጅልስ እብ መትሰባል እግል ልሸቀው ተሐሰበ።

ምጅልስ ዲብለ ትቀደመ አርእስ ክም ናቀሸ፡ ህዳይ ንእሽ እት

አዋልድ ሐል እግል ልትባሰር እሉ፡ ለልትሐረክ አሳር መትሐፍ እግል ልትዳሌ እግሉ፡ ለኢልትሐረክ ህዩ ዓቅቢት-ትርድት እግል ትዩመም እሉ፡ ሐረሰቶት ባዳል-ዘርእ እግል ልትነፍሱ፡ እብ ሒን ሒኑ ህዩ ሐብሬ እግል ትትሀየሎም፡ ክምሰልሁመ መጅተመዕ ዲብ ዳፍዶት ጀራይም ወዐገብ እብ ፈዛዐት እግል ልሸቁ፡ ደሐን ድዋሩ እብ ዋጅብ እግል ልታቤዕ ለልብል ውበዕድ ቀራራት ሓሰፈ።

እምበል እሊመ መጅልሱ፡ መሕዝ መዋሰላት እግል ልርኔ፡ ናይ ብሕት አተባሳት መራቀብት ዋጅብት ዲብ ገብእ ዲብን ከደማት ለሀህይብ እቡ መጃል እግል ልትከሰት፡ መትነፍሶት መጎጎ-አድሐነት እግል ልትወሳዕ ክምሰልሁመ ሸዐብ ዲብ ፈዳልየት ቀራራት ወፊናታት ምጅልስ መሻረከቱ እግል ልወቅል ትፋኑ። እሊ ክእን ዲብ እንቱ እዳረት

አቅሊም ግብለት፡ ናይ ሰነት 2022 እብ መዓወነት አጅሀዘት አቅሊም ወሸዐብ ለትሰርገለ በራምጅ ገማል ወእዳረት፡ መሕበራይ ወእቅትሳድ፡ ክምሰልሁመ ሰዶሰት ወዓዳት ጌመመት።

እት ዮም 6 ኣፕሪል ዲብ መዲነት መንደፈረ እትለ ገብእ ህድግ፡ ሓክም አቅሊም ግብለት አሰይድ ሀብቴአብ ተሰፋጺን እትለ ቀደመዩ ተቅሪር፡ ዝያድ 81 አልፍ ሸዐብ ለሻረክ ዲቡ፡ ዲብ ሕፍዘት ማይ ወትርበት፡ አሰነዮት ጽርግያታት፡ ረሀያታት ክምሰልሁመ ሸቲል ዕጩይ ለሸምል ወራታት ገማል ክም ትሸቀ ሸርሐ።

ገሸለት ሕማም ኮርን ሻይረሰ እግል ራቀቦት እብ አርት እንክር፡ ፈዳልየት ለትኡተን በራምጅ እግል ትትአከድ ህዩ እብ ካልእ ጀሀት፡ እብ መዓወነት ጀሃት ሕኩመት ወጅብሀት ሰኔ ክም ትሸቀ ለሐበረ አሰይድ ሃብቴአብ ፈርሀት ምን ገሸለት ‘ኮቪድ-19’ ወእግል ልትከረዐ ለፈግረ ንዛም ዲብ ወራታት መሕበራይ እቅትሳድ ሸዐብ ሸንርቡ ቀላል ምንመ ኢዐለት፡ ፍገሪትለ ገብእ ጅሀድ መዳፈዐት ላኪን ሰኔ ክም ዐለ ሐበረ።

ደዓም ከረም፡ ዲብ ለበዝሐ ምዴርያት ዝላም ሰኔ ሰበት ዘልመት፡ እተይ ምንለ ሰነት ቀዳሚት እብ 25 ምእታይት ክም ዜደ፡ 319 ከዛናት ወራህያታት ህዩ ማይ ካፊ ሰበት ጸብጦ፡ ዲብ ዐማር መሰኖ ሰኔ ነፊዕ ክም ህለ ኡብርሀ።

አሰይድ ሀብቴአብ እንዴ አትሉ፡ ደማንቱ ለትአከደት ማይ-ጭሩይ እግል ወጀዶት እብ ፈዛዐት ልትከደም ክም ህለ እንዴ ሸርሐ፡ ዲብ ዐድ-ፈለሰቱ፡ ክሳድ-ዳዕር፡ ዐደውሐ፡ ገዛ-ድንገር፡ ሰንዐፊ፡ ዐድ-ሰጣሕ ወዐድ-ሐርገጽ፡

ከደማት ንዛም ማይ ክም ትዳሉ፡ ዲብ ሐምስ ምዴርየት ህዩ እግል አዳም ወንዋይ ከደማት ለልሀይብ ከዛናት-ንኡሽ ልትሸቁ ክም ህለ ሐበረ።

እብ ደረጀት አቅሳም አቅሊም ወአፍርዐት ውዛራት ለትሰርገለ ወቀይ እብ ከሰስ እትለ ቀርብ ተቃሪር ህዩ፡ ሸዐብ ዲብ ጠወሮት ወራታት ደረሰ ወአድረሶት፡ ክምሰልሁመ አትሓያስ ከደማት ዓፍየት ዝያድ 4 ሚልዮን ነቅፈ ሰዳይት ክም ወደ፡ እግል ሕገዛም ወዳይላት ሸህደ ህዩ እት-ክል ድዋር እብ ደረጀት ሰነን ደገጊት እንዴ ኢተርፍ ሰዳይት ክም ገብአት ወድሐ።

ዲብ ደንጎበ መሻርከት፡ እንዴ አምበተ ለኢተመ ከዋ መዋሰላት ዐዳቀዩሕ-ዐሸረ፡ ለልአተላሌ እብ ገበይ እግል ትትረከብ፡ ሰሪት ዕጩይ እግል ልትከረዕ፡ ምስዳር ትርድት እግል ትነሰእ፡ እግል ሐዳይሰ እዳርዩን ደዋዩሕ ተእሂል እግል ልትዝም፡ ከዋ ምትሐርክ-ተለፎን ለአለበን ምዴርያት ማይ-ምኔ፡ ጸርኑ፡ ወማይ-ዐይኒ ህዩ ሐል እግል ልትሐዘ እግለን ለልብል ውብዕድ አረእ ቀደመው።

ሓክም አቅሊም ግብለት አሰይድ ሃብቴአብ ተሰፋጺን እት ደንጎበ፡ እንዴ አንበተት ለኢተመት ብንዩት-ተሕትየት ሐርሰ እግል ትትመም ወሐዳስ እግል ትትዳሉ፡ እብ ደረጀት መጅተመዕ እተይ ሐርሰ ለልአበርክት ወራታት ሕፍዘት ማይ ወትርበት ክምሰልሁመ ሸቲል ዕጩይ እብ ርኪቡ እግል ልትሸቁ፡ መሻሬዕ ቀረቦት ማይ-ጽሩይ ለአለበን ደገጊት ሕፍዝ እንዴ ገብእ ዲብን እግል ልትሸቁ እለን፡ እትለ ሰነት ጎነ እግል ልትሰርገል እትቡት ምን ህለ በራምጅ ክምቱ ሐበረ።

ሳወ፡ መድረሰት ፈንዩት ሀማሞስ ዲብ ወራታት ዐማር



ሕኩመት እግል ዲብ ወሬሕ አብሪል 2007 ዲብ ሳወ ለትፈትሐ መርከዝ ተእሂላት-ምህነት እብ መቅደረት-አዳም ወአላት እግል ጠወሮቱ ትወድዩ ለጸንሐት ፊራሮ-ገዜ፡ ዲብ በቃዐትለ ልትሀየብ ተእሂላት መትቀዳም-ሰኔ ክም አርኡ፡ መደርሲን ወደረሰ ሸርሐው።

ምዲር መድረሰት ቴክኖሎጂ ብናእ 02 መምህር ላይኔ ያቆብ እትለ ሀበዩ ሐብሬ፡ ዲብ መድረሰቶም ሕዳደት ወንጃረት፡ መዲድ ዐነድር ማይ ወካፈሎቱ፡ ዓም አሸቃል ዕጩይ

ወአካን ሸቅል ማሺን፡ እብ ዓመት ሐምስ መጃል ምህነት ለከምከመ ተእሂል ክም ልትሀየብ ሐቀለ ሐበረ፡ እብ ፍንቱይ ዲብ ሰነት 2017 ለትዳለ ዋወር ናይ አድረሶት ማሺኔሪታት ወአላት ተዕሊም፡ ዲብ በቃዐት ናይለ ልትሀየብ ድራሰት ፍገሪት ሰኔ ወዴ ክም ህለ ሐበረ።

ምዲር መድረሰት ቴክኖሎጂ ብናእ 01 መምህር ነጋሲ ክፍሌ እብ ጀሀቱ፡ እብ ሰስ መጃል በህለት እብ አውቶ-ሚካኒክ፡ አሸቃላት ብናእ፡ አሰነዮት ኮምፕዩተር ወንዛም

ሸበከት፡ ኤሌክሪሲቲ፡ ኤሌትሮንያት፡ እዳረት አላት ክምሰልሁመ ተላጀት ወንዛም አብረዶት ተእሂል ክም ለሀይዕ ሐቀለ ወድሐ፡ ውቁል ምራድ ደረሰ፡ መትሰባል መደርሲን ወመረብየት እንዴ ተሓበረ ዲቡ፡ ለተተአትሐዜ በቃዐት ትረከብ ክም ህሉት ሐበረ።

ደረሰ እትለ ሀበዉ ረኡይ፡ ዱሉይ ለህለ አብነት ተዕሊም፡ እብ ዋወር ማሸናት ለትሰደ ባቂዕ ምህናት እግል ልትዐንደቅ ቃድራም ክም ህለው ሐቀለ ሸርሐው፡ እብ ፍዕል ክም ሸቁ ዲቡ ወክም ጠወሮ አከደው።

መዳርስ ቴክኖሎጂ ብናእ 01 ወ 02 ክምሰልሁመ መድረሰት ትጃረት ወእዳረት ለከምክም መርከዝ ተእሂል ምህናት ሳወ፡ ዲብ 13ይት ደውረት ተእሂል ነስኦ ለህለው 914 እንዴ ወሰከ 10 አልፍ ወ 741 አንሳት ለልትረከበ ዲቦም ዝያድ 23 አልፍ ደረሳይ እብ ለትፈናተ ምህናት እድሐር ህለ።

አግማይት፡ ከዳማት ማይ መሕደር

ክምክምት ለዐውት

ሰነን እዳረት ደዋዩሕ አግማይት - ምዴርየት ከርከበት፡ ዲብ ጁላይ 2020 ለትዳለ እግሉም መሸርዕ ማይ ጽሩይ፡ ጠዐም መናበረት ሳብተት እግል ልአዳውሮ ክም ሰደዮም ሸርሐው።

ህቶም እግል ኤሪን እትለ ሀበወ ሐብሬ፡ ለመሸርዕ ቀደም መትዳላዩ፡ እግል አርወሐቶም ልግባእ ወእግል ንዋዮም ማይ እግል ልርከቦ ገበይ ረያም ካትሮ ክም ዐለው፡ እሊ ህዩ ተዐብ ወሕማማት ሰብብ እቶም ክም ዐለ ሐቀለ ሸርሐው፡ ለእት ኩብድ ዐዶም ለትሸቀ እብ ጣቀት ጸሐይ ለሸቁ መሸርዕ ላኪን፡ ለዐለ እግሉም መሐግዝ ክም ገልጸጸዩ አብርሀው።

ምን ዐባይ ዐድ - ሼኽ ዑመር ሰሌማን፡ ለኩብሮ ዲቡ ድዋራት ጠቢዐት ሰቦት (ሳሕረ) ለቡ ወማይ እብ ቀሊሉ ለኢልትረከብ ዲቡ ሰበት ቱ፡ ዲብ ደማንት ለቡ ድዋር እንዴ ትከምከመው መናበረት ሳብተት እግል ለሐልፎ

ወመትነፍዐት አብነት ከደማት እጅትማዕዩት እግል ልግብኦ ሰዱድ ክም ዐለ ሐቀለ ሸርሐ፡ ለመሸርዕ ክም ትዳለ ላኪን መስኩበት ለበ መናበረት እት መርሐ መትነፍዐት ከደማት ተዕሊም ወዓፍየት ክም ገብአው ሐበረ።

ምዲር ምዴርየት ከርከበት አሰይድ ዐብደልከሪም እድረሰ እብ ጀሀቱ፡ እዳረት ደዋዩሕ አግማይት ምን ከርስ እዳረትለ ምዴርየት ረዩም ሰበት ህሉት፡ እምበልሁማ ሰነን፡ እግል ረኪብ ማይ እት ክል-አካን እንዴ ትፈንጠረው ሳክናም ክም ጸንሐው ሐቀለ ሸርሐ፡ መዳላይለ መሸርዕ እት መትከምክም ደገጊት ብዙሕ ክም ሰደ ሸርሐ።

ሐድ 4 አልፍ ሰነን ለበ እዳረት ደዋዩሕ አግማይት፡ ምን መርከዝ እዳረት ምዴርየት ከርከበት ላተ ርከብ እንክር ቀብለት ምውዳቅ-ጸሐይ ሐድ 135 ኪሎ ምትር ራይመት ትትረከብ።

ዐ-ሰማን ነፈር ካልአይት ደውረት ክድመት ወጠን ቱ።



ዐ-ሰማን ቀደሕ ረዩም ሰልሰለሰ መሼደል ለቡ መንደላይ ቱ። ዐ-ሰማን ለትብል ሰሜቱ ዲብ ዐዱ ልትብህል ዐለ እንዲኢኩን ምን ዲብ ክድመት ወጠን ትብገሰ ላቱ እብ ዌርሳይ ልትአመር ዐለ። ዐ-ሰማን እብ ምስሉ ሸቁ ጸሩ ወመስኡሊት ሰኒ ፍቱይ ወሕሹም ቱ። ለትብገሰ ዲቡ ሸቁል ህይ እብ መዕጸም ወንዩት ለአተምሙ ሰበት ዐለ መልሂቱ ጋኖም ሰክብ ምኑ ዐለ።

ዐ-ሰማን እብ ምስል ጸሩ ለዐለት እግሉ መስንዮት ወእብ ዲብ ሸቅሉ ለርእዩ ለዐለ መንፈዐት ሐቲ አምዕል ሚርሓይ ፈሰለቱ ትለከዩ ወክእነ ቤለዩ፡- “ተማም በገ ከአፎ ወዐልክ? ሸቅል ህይ ከአፎ ህለ ህለ ምስልክ? ተሓምቁ ህሌክ ወለ ለሓምቀክ ህለ? እንተ ወሸቁል አዩ ምንኩም ፈድብ? ዲብ ልደአል ትሰአለዩ። ዐ-ሰማን ላቱ ምን ቀደሙ አጊድ ኢልትሃጌ እንዲኢኩን ህግዩ ወደአል ሐቀ አሰብደ ደአሉ ወመባልሱ ሰኒ ጥዑም ወመስሕቃይ ቱ። ለዲብ አድሕድ ቅርጥን እቡለ ለዐለ ብሱቱ አሻይር ሱሓቅ ወሐጠር ዲብ ልትቀራሕ ዲቡ፡ “ሰኒ ህሌነ ሸቁልመ ዶል ሐቲ ነሓምቁ ወዶል ሐቲ ለሐምቀነ ህለ፡ “ፈድብኒ ረክቤኒ” ቤለ ልብሎ ፈዳብ አነ ወሸቁል ሸዕብየት እብ ከአፎ አትፋደብክ? ሸቁል ሸዕብየት እንቱም ይከአሎ ምን ኢትፍፈደብ እብ ፍድብ ምን እግል ልጃገሩ ሕነ አዜ እንወርሱ ህሌነ” ዲብ ልብል ሰሐቀ እግሉ።

ሚርሓይ ፈሰለት እብ ዐ-ሰማን ለሀብዩቱ ትሩድ በሊሰ ሰኒ ዲብ ልትፈከር ወምን አጭፋር እገሩ አሰክ ረአሱ ዲብ ገንሐ “በጋ ምን ዮም አምዕል ሚርሓይ መጅሙዐት

“ታሪክ ለዲመ ኢብዴ” (1፫ክፈል)

ህሌክ። ዲብ ሸቁልክ ህይ ፈድብ ወተርድ አብሸርክ” ቤለዩ ዲብ መርከቡ እት ጠፍጥፋ። ዐ-ሰማን እግል አዩ ሸቁል ዱሉይ አነ እብ ተአሸር ግንሐት ሐቀለ ገንሐዩ “ሚርሓይ መጃምዕ እግልሚ አትሐዘ? ዲብ እለ ለህለ አዳም ምርትክ ሸቅሉ ለልአምርቱ ያሽክ” ዲብ ልብል ተሀገዩ። ሚርሓይለ ፈሰለት ህይ “አማንካቱ



ክሉ አዳም ምርትክ ሸቅሉ ለአምር ወምህመቱ። ላኪን ቃኑን ናይ ዐሰከርየት ክምሰልሁቱ ሚ ኒዴ እንዲኢኩን ዴሸ ኤረትርየ አማውር ምን መስኡሊት ኢልትጸበር። ምርትክ ሸቅሉ ለአምር ወሸቅሉ እብ ምርትክ ሸቁ። እሊቱ ህይ ምስጢር ዐውቴነ” ዲብ ልብል በልሰ ዲቡ። ሐቀ እለ ዐ-ሰማን ብሬኑ እንዴ ረፍዐ እግል ድራር አሰክ አካን ከሸነት ጌሰ።

ዐ-ሰማን ምርትክ ክድመት ወጠን ሐቀ አትመማቱ ሰዓድየ ለትትብህል ወለት አቡሁ ሃዲ ለዐለ። ሳምየ ለሰመየ ወለት ህይ ትብከረ። ዐ-ሰማን እግል ሳምየ ወለቱ ሰኒ ፈትየ

ክሉ ወቅቱ ምስሉ ሐቀ ኢህሌት ትትካዩል እግሉ። ምን ክድመት ሐቀ አቅበለ ዲብ ዐዱ አድብሐ ድኳን እንዴ ወደ መንበረቱ መርሕ ዐለ። እብ ዐለት እግሉ ፍቲ ሸቁል ወመስንዮት ምስል ዘባይን ለእብ ብራቁ ርፋፍ ፍቱሕ ዲቡ ለዐለ እብ ብዳዐት ረግሐዩ።

እትሊ ወክድ እሊቱ ለዲመ ኢናዮም ለልአቃምቶ ዜምተት ወሰብ አከይ ፍዕል ላቶም ሕኩመት ማሌሊት እብ ባድሚ እንዴ አመስመሰት ወራር ድድ ኤረትርየ ለዐለነት። ዐ-ሰማን እት ወክድ ለህይ እግል ክልኦት ወሬሕ ዲብ ዐማር ወጠን ፍሩር ዐለ። እባሁ ህይ ቅብላትለ ቃንጽ ለዐለ ወራር እብ “ሱሩጊት” ዲብ ልብል ለሰምየ ብሬኑ አባይ ዔረት ወኢትፈረረት እግል ልውዴ ዲብ ዴሹ ተሓበረ። ዐ-ሰማን አወላይ

ወራር ወያኔ ክምሰል ፈሸለ እብ እጃዘት እንዴ መጽኦ እግሉ ዲብ ድኳን ለዐለ ዓፍሹ አዝበዩ። ለህዩባቱ ለዐለየ አምዴላት ክምሰል ከለሰየ ህይ እግል በዐል ሻሙ ላተ እሊቱ ወእግሉ ምን ክሉ ልቡ ለፈትየ ሳምየ ወለቱ “መዐሰላመ” እንዴ ቤለየን አሰክ ዴሹ አቅበለ።

ዲብ ዴሸ ክምሰል አቅበለ ሐቀ ክልኦ አምዕል እግል ድራሰት አሰክ ዓለ ጌሰ። ዲብ ዓለ ናይ ምርት ወሬሕ ወሰር ሸቁል መስኡልየት ሚርሓይ ፈሰለት ደርሰ። አመውር ዐሰከሪ ገብእ እንዲኢኩን ዐ-ሰማን ምነ “ሱሩጊት” ዲብ ልብል ለሰምየ ብሬኑ ካልእ ሸቁል ወኢሐረ።

ብሬን ዐ-ሰማን ሱሩጊት ብዙሕ ታሪክ በ ወሰኒ ፈትየ ዐለ። ዶል መ ኖሱ ዝናደ ጸብዋ ዲብ እንቱ ለሰበ አከጃህ ዌረት ገፈትእ ትወድዮምተ ልትረዩሕ እግሉ ዐለ። ሱሩጊት ዲብ ሰነት 1990 ዲብ ጀብህት ግንዳዕ ጨቁምጢ ለትትብህል አካንተ ዲብ ምን አባይ ለሰለበት። ምነ አምዕል ዲብ እዴ ፋርስ ዴሸነ ለአቱታተ ህይ ምን ፋርስ ዲብ ፋርስ ዲብ ትሓልፍ እት ዐ-ሰማን (ዌርሳይ)



ዋርሳይ ክሉ ወዲብ ክሉ ለአወቁ

በጽሐት። እብሊቱ ህይ ሱሩጊት ዲብ ልብል ለሰናቅዩ።

ዐ-ሰማን ዌርሳይ ድራሰት ክምሰል አክለሰ አሰክ ዴሸ ጀብህት ዘለምበሰ ትወከለ። ለምን ክሉ ቀልቦም ፈትዉ መልህያሙ ለእግል ወሬሕ ወሰር ፍንቱዮም ለዐለ ዐ-ሰማን እብ ቀልብ ፋርሕ ትከበተዉ። ፈጅራተ አሰቡሕ ህይ ሚርሓይ ሰርየቱ እንዴ ትላከዩ “ዌርሳይ አሰናይ ደሐን መጽኦከ። ድራሰት ህይ ከአፎ ሓልፈት? ሰኒ ትፈሀመተኩም ማሚ?” ዲብ ልብል ትሰአለዩ። ዐ-ሰማን ሕልቅሙ እግል ለሐሳሕቡ መሰሰኒ ሐቀ ሐመሓመ “አሰናይ ደሐን ጸንሐኩም፡ ድራሰት መሸአህህ ብዙሕ ሰኒ ሐልፈት” በልሰ ዲቡ እትጃህለ ባብ ዲብ ለአትቃምት። ለሚርሓይ ሰርየት ምን ሰንዱቅ ሐቲ ናይ አርኒክ ላቱ ገፍተር እንዴ አፍገረ። ሸወዩ ሐቀ ከታተብ “ኮይሰ አቡ ዐፋን እግልሚ ሉኩይክ ህሌኮ ምነ ደርስ ለእግሉ ደረሰክ ፍህምኩሁ ትገብእ የምክን። አዜ ወክድ እንዴ ኢገይሰ ምኒን ዲብ አወላይ ፈሰለት እንዴ ግሰክ ሸቁል አስተልም ምኑ፡ ህቱ ምኒን ቅዩራሙ ሰበት ህለው።” ዲብ ልብል ተሃገዩ ዐ-ሰማን “ኮይሰ” ቤለ ወጊሰ ምኑ።

ዐ-ሰማን (ዌርሳይ) ምን አወላይ ወራር ግዛም ወያኔ እንዴ አሰብደ ዲብ ብዙሕ ሕሩባት ሹሩክ ቱ። ለዐቤት ወናይ ዐጃይብ ታሪክ ለሸቀ ዲብ ናይ እግር መክል መዕረክት ዐለት። ዐ-ሰማን ምነ ዶል ሐርብ አንበተያተ ፈሰለቱ እንዴ መርሕ አዋምር እግል ሚርሐት መጅሙዐት እት ለህይብ ወምን

ውቁላም መስኡሊት አማውር ዲብ ልትከበት ዲብ ለሐርብ ወለትሓርብ ወዐለ።

ሳዐት አርበዕ ናይ ምሴ ገብእ ሐቲ ምን ኑዕ አንፈብያን ላተ ደባበት ፈሰለት ዐ-ሰማን ዐለት ዲብ ገበይ ጋንሐት ዲብ እንተ ክም ሼጣን ዲብ ተዐሰሰ አሰኩም ፊተተት። ዐ-ሰማን እሊ ሰድ እሊ እግል መድፈዐጂ አርበጂ ሐቀ እግል ትልከፍ ኢጀረበት ኢትዝበጠ ትም እንዴ ቤልክ ረአዩ፡ እብ አርወሓተ እግል ንሰለባቱ” ቤለዩ። ለመድፈዐጂ ላተ አዋምር ዐሰከሪ ገብእ ዲቡ እንዲኢኩን ሰኒ እግል ልዝበጠ ፋቲ ዐለ። ላኪን ክልዶል ዲብ ዐሰከርየት አዋምር እግል ትካልፍ ሰዱድ ቱ።

ለደባበት እንዴ ኢትለክፍ ዶል ለተማም ድፈዕለ ፈሰለት ሐልፈታተ እግል ትልከፍ አንበተት። እሊ ሰድ እሊ ዐ-ሰማን ዲብ ቅሩብ ሰበት ዐለ እብ እንክረ ሓረ እንዴ ዐርገ ዲቡ ምን ለዐል እብ ፍቱሕ ለዐለ ባብ ቅንብለት እዴ ሎሽ እተ። ክሎም ዲብ ጅወተ ለዐለው ህይ ጨበል ሞሻት ገብአው። ወደባበት እብ ከማለ ዲብ እዴ ፋርስ ዴሸነ አቱት። ክሎም እተ ባካት ለዐለው መልህያሙ እብ ዐ-ሰማን ለወደየ ናጅሐት ዐመልየት ዲብ ልትሐበኖ “ተዐወት ተዐወት ፋርስ ሰኒ ወዴክ እዴክ ትከት ትግባእ ዲብ ፋርስ ወድ ፋርሶታት” ዲብ ልብሎ ዕለላት ወቀለው። ዐ-ሰማን ህይ ሰኒ ተሐበነ ዎፈርሐ።

ኬትባይ፡ ዐ-ሰማን ዐመር ሰፋፍ ምን አዶብሐ



ዕያደት ዔለባቡ ወክድመተ

እት አቅሊም ቅብለት በሐር ቀዩሕ ምዴርየት አደብሐ፡ እት እዳረት ወዋይሕ ዔለ ባቡ ለሀሌት ዕያደት ለተሀይቡ ክዳማት ዓፍዮት ሚ ክም መሰል መለሀይነ መሐመድ እድሪሰ መሐመድ እተ ባካት እንዴ በጽሐ ምስል ዎሮ ምን ሐካይመ መቃብለት ወደ። ከለተሌ ጽበዋ ናይለ መቅብለት ተ።

ለመቃብለት ምስል ዎሮ ምን እተ ዕያደት ለሀለው ሰለሰ ሰብ ምህንት ዓፍዮት፡ ሴድያይ ኔርሰ እድሪሰ ዑሰማን መሐመድ ዐሊ ገብአት። ሴድያይ ኔርሰ እድሪሰ እት ሰነት 2009 ህቱ ወሕቱ ምስል እት መድረሰት ነርሲን ግንደዕ እግል ልድረሶ ለረክበዉ በክት እንዴ ኢለአበድዎ ክልኢቶም ምስል ደርሰው፡ አዜ ሕቱ እት ዕያደት ድሪት ወህቱ እት ዕያደት ዔለባቡ ክም መስኡል እንዴ ገብአከድም ህለ። ለሰልፍ ትቀደመ እቱ ሰአል፡ “ሐካይም ዔለባቡ እግል ሽዐዎም ለሀሀዩብ ክድመት ሚ ትመስል፤” ለልብል ዐለ እብ ክምእነ ህዩ እግለ ወቀዮም ሸርሐ።

ለዕያደት እት ሰነት 2019 ወሬሕ ሰለሰ መብናህ እንዴ ተመ ሸቅለ አንበተት። እት ሐንቲህ ለልትራዔ ሸዐብ ህዩ ዝያድ ክልኢ አልፍ ገብእ። ምናተ እሊ ሸዐብ ለእተ እዳረት ደዋሒ ነብር ሌጠ ኢኮን ለሳፋ ወለለዕልዎ። ምን ብዙሕ አካፍት ለሰብክ እቶም ሸዐብ ህለ። ምን ዐንሰቡ፡ ምን ጋሽ በርከ - አስክ ምን ከረ ከርከበት፡ ክምሰልሁመ አስክ ዐሬርብ ለልሐልፎ እበ አካን እንዴ ኬደው ሰበት ለሐልፎ አስክ ዲበ ህለው ዕያደት ዔለባቡተ ለተዓውናም። ከረ ዐሬርብ፡ ሀገር ንኢሽ፡ ሀገር ዐባይ፡ ሐፍተ፡ ዐይነት እሊ ክሉ አምዳር እሊ ዓፍዮቱ እተ ትትረዔ፡ አንሱ እተ ወልድ፡ አጀኒቱ እተ ልትከተብ (ልትገረሕ)፡ እግል አዋልድ ደነግል ለልትህዩብ ክታብት ቱቱነሰ ለነሰኣመ ምን ረክባህ።

ለዕያደት ምን ክድመተ አንበተት ሳልሰ ሰነታቱ፡ ምን ሕርየት መጽት አስክ 2019 እተ ዐለ አውካድ እሊ ሸዐብ ከፎ ወዴ ዐለ፤ አክልሚ መሓግዝ ዐለ እቱ፤ እግል ልሸረሕ እሉ ክም ትሰአለዩ ኔርሰ እድሪሰ እግል ሳሕሬ መሐመድ እድሪሰ ክእነ ቤሉ።

“ክም እሊ እንዴ ኢትትቤ ንቅጠት ዓፍዮት ዐለት እቱ፡ ለንቅጠት እግል ዳሕየት ዔለባቡ ሌጠ ክድም ዐለት እግል ኢበል እቀድር። ምን እለ ዕያደት እለ ገብአት ላኪን እትለ ሐልፈተነ ሰነት 2021 ሌጠ 152 እሲት አውላድ። እሊ አንሰ እሊ እለ ዕያደት እንዴ ኢተህሌ እት ቤቱ ወልድ ለዐላቱ። አዜ ምስለ መትረኩበለ ክድመት ላመ ሸዐብ ፈዝዐ ወመንፈዐት ወሊድ እት ሐንቲ ሐኪም ሰኒ አመረየ። እብ ኖሱ መጽእ ህለ፡ ምን ሀገር ዐባይ፡ ሀገር ንኢሽ፡ ዐሬርብ እትለ አካን እለ እንዴ መጽአየ አስክ ወልደ እብ አባይተን እንዴ መጽአየ ዲብ ቅሩብለ ዕያደት ነድቀ ውሓለተን

ታበዐ ጸነሐ። ምሕጽ ዶል ለሀርሰ ህዩ እትለ ጎነ መጽእ ወእብ ሰዳየት ሐኪም ወልደ።”

ፈሀም ናይለ ሙጅተመዕ እብ ክሰሱ ዓፍዮቱ እብ ዓመት ወዓፍዮት እም ወውላደ እብ ዝያድ አክልሚ ውቁል ህለ ትብል፤ ወዶር ናይለ ሐካይም እት ወቀሎትለ ፈሀም ከፎቱ፤

“መሸለህ ዮም አዳም ክሉ ፍህም ህለ። በዲር እምበል አትራዛቅ እግል አስእለክ ክለን እለን አንሰ እት ቤተን (ክደን እግል ኒበሉ እንቀድር) ወልደ ነብረየ። ዮም ላኪን ምን ሕክምነ በረ ለትወልድ ኢህሌት። እሊ ህዩ እብ ኖሱ-ኖሱ ለመጽእ ተቅዩር ኢኮን። ሕነ ምስል መስኡሊን እዳራት እንዴ ትፋህምን እግለ እተ ሙጅተመዕ ለነብረ እምልዳት ምስልነ ክም ልትዓወነ ወዴ። ወእብ አማን ተቅዩር ረኤ። እሊ ህዩ ሸቅል ናይነ በደንነ ለአምጸአየ ኢኮን እዳረትመ መጦርን እንዴ በጥረትቱ ለተፈዚዕ ወትሳዴ።”

ዐምሳት አስክ ውቀት ወሊደ ከም ዶል ከሸፍ እግል ቲዴ ብእተ፤

“ቀደም ወሊድ ዐምሳት ሰማን ዶል እግል ትትረኤ ምንመ ወጅብ እለን ለዲብነ መጽእ ዐመሲ ቀደም ውልደተን መብዘሐን ሐምሱ ሰስ ዶል ከሸፍ ወድዩ። ለእት ረይም ህለየ ህዩ እበ ህተን ለሀይባናቱ ሐብሬ ውልደትኪ ባካት ምዕል ፍላን እግል ትግበእቱ ክም እንብለን ዶል ለወርሐን ቀርባተ እት ባክ እለ ዕያደት ቤተን ነድቀ ወዲበ ጸነሐ። ደሐንን ምን ሐዘዩ ወላመ ሰብአን እለ ምን ረደው ድኢኮን እትለ ጎነ እምበል ክድመትለ ምህንት ብዕደት፡ እብ መሳርፍ፡ መስኩብ ልግበእ፡ ንጻፍ፡ ሙነት ለትገብእ እለን ምንእነ ለትትህዩበን ሐበት አለቡ። ምን ርሐን ቱ ለልትዓየሸ።

እግል ሓሪት ምስል ሸዐብ፡ እዳረት ወዴሸ እንዴ ትፋህምን



ገሌ ሰለሰ ቅርፈት ለገብእ አብያት እግል ነአዳሌ እት በርናመጅነ ህለ፡ እንሻለህ እትሊ እያም ቅሩብ ንትዐውት እቡ እንገብእ።”

እትሊ መሳክብ እሊ ብዙሕ አውካድ ለልትረኤ አምራድ ህዩ ሚቱ፤

“እትሊ ለልትደጋገም ኒሞንዩ (መእረር ሸነብእ) ህለ፡ ፍጋር፡ ከረም ዶል ሰኔ ህዩ እብ ሐድ ቅያሰ ምላርየት ትትረኤ . . . ላኪን እብ

ዓመት ለመጽእነ አድውየት ካፊቱ፡ እት ክል ሰለሰ ሸሀር ንትሸረፍ። መትሻቀዩመ እግልነ ለገብእ ብነ፡ ምላርየት ለእንመርምር እቡ እት ክል አካን ብነ፡ ምስለ ሐካይም አገር ህለ፡ ህቶም እንዴ መርመረው ለረክበዉ ወረቀቱ እንዴ ሀበዉ ዲብነ ነድእዉ ወሕናመ ካልእ መርመረ እንዴ ወዴነ ነአክድ እሉ ክልትዳዩ። መርመረ ኤኾ አይሺ ህዩ እትለ ዕያደትን እንወዴ ምኑ ለልሐልፍ መትሻቀዩ ላኪን አለብነ። አውላዶት ምን ዐቢ ሸቅልናቱ፡ ምነ ሰለሰ ሐካይም ለክልኦት አውላዶት ዳርሳም ሕነ። ለገብአት ለትመጽእነ ዐምሳት ብዕድ መሻክል



መርከዝ ዓፍዮት ዔለባቡ

ሕቡሉክ ምን አለበ እትለ እንዴ አውላድነ ወግረ ውላደት ለገብእ መርመራታት እንዴ ወዴነ እለ እንሳረሐ። ወራድኢት ውቅል ተሐዜ ገአት ምንገብእ ነሓልፈ።”

ሰኒ ሐል ሻፍግ ለለሐዜ መሓግዝኩም ህዩ ሚቱ፤

“እትለ አካን አወል ለዐቢት መሸከለት ኢህለዮት አምቡላንሰ ተ፡ ክምሰልሁመ ለልትበለዕ ወልትሰቱ (መቀዝያት) ኢህለዮቱ እተ እማት ድዕፍ ሰብብ ለሀላቱ። ለአጀኒት ለእብ ኢረኪብ ነብረ እንዴ ደዐፈው ለመጽኡናመ ብዙሕ እግል ንሰደዮም ይእንቀድር፡ ፕሮቲንቱ ለሀለ እኑ ብዕድ ከረ

ቅዋት መታበዕት ሕዱድ ነአስእል እብ ራድዮሆም ዲብ ድሪት ዘብጦ እነ ወክእነ መሰል ሕሙም ህለ እነ ዐረብየት እበ ምጽኡነ እምብሉም ወረድኡነ ዐለው። አዜ ላኪን እለ ራድዮ እለ በጥረት፡ ወህተ ክም በጥረት ምን እለ ዔለባቡ አስክ አደብሐ ንኡሽ ነፈር እንከልፍ (እንልእክ)፡ እብ እገሩ፡ ከዐረብየት ሀቡኒ ልብል፡ ህሌት ምንገብእ እብ ዐረብየቱ መጽአነ። እግል ኢትጽንሐመ ትቀድር እግልሚ ሐቱ ህታተ ለህሌት ሕሙም እቡ ጋይሰት ትጸኔሕ ወብዕድ ለእቱ ትትፈረር አሸቃል እግል ልጽነሕ እለ ቀድር። ከእብ እንክር ኦሮ ሸበክት እትሳላት ኢህሌት እብ



እድሪሰ መሓመድዐሊ

ነአተክርረ ወእንታብዐ።

ምን እዳረት ደዋሒ ዔለባቡ በረ ለሀለዩ ዐዶታት ህዩ ከፎ ትወድወን ደወ ካሬ ትረክቦ እለን፤


“ምን እለ ቀርየት እለ በረ ለሀለዩ፡ ዐሬርብ፡ ሀገር ንኢሽ ወሀገር ዐባይ ህለዩ። እት ሀገር ንኢሽ ሐኪም አጋር ህለ፡ እት ዐሬርብ ወሀገር ዐባይመ አር-አር ሐኪም አጋር ህለው ወመቅርሐም ምስል ድሪት ቱ። ደወ ምነ እንዴ ነሰአው እብለ መጽኡነ።”

እለ ሰለሰ ሰነት ዋድየት ለህሌት ዕያደት ዔለባቡ መብናህ ከፎቱ፤ ምነ ቅዱማቶጥፍተሐጆጅ እቡ ሚ ህለ፤ ለልብል ሰላላት እት ደንጎበ ለትቀደመ እቱ ቱ። በሊሱ ህዩ

“መብናህ ካሬቱ ንኢሽ-ንኢሽ ነቃሰ ምንመ ኢልትሐገል፡ ማይ ብዲበ ወክሀረበት፡ ሰኔትት ተ። መሕገዝለ ሸዐብ እንዴ ትረኣ ላዘም ትትፈተሕ እንዴ ትበሀለት መጽኡነ ከሸቅልነ አንበትነ ዲበ ድኢኮን ድሕርትመ ኢህሌት። እሊ በክት እሊ ለብዕዳት ወረክበያሁ ሰኒ ዐለ፡ እግል ሰኒ ወአማን ረይም ምን እሊ ዕያዳት ለሀለው እት ከረ ሐፍተ ወሀገር ዐቢ ክም ትከሬከ ለሀለ ደዋሒ ሕኩመት ረኣይ እንዴ ረኤት እሊ ክእነ በክት እግል ልርከቦ እፈቱ።”

ዲብ ደንጎበ ምን ሰካን ዔለባቡ ላተ አሰይዶ ፋዋነ ሓምድ እብ ሰበት ዕያደት ዔለባቡ ወእብ ፍንቱይ እግል አዋልድ አንሳት ለወዴቱ መርሀዮ ዲብ ትትሃጌ እሊ ለተሌ ረኣይ ሀበት፡

አዋልድ አንሳት እሊ ደዋሒ ዎሮ ምነ ረክባህ ከደማት እለ ዕያደት ተ። እብ ፈድል እለ ዕያደት እማት መራዲት ውላደት ወአጀኒትመ ተግሬሕ ረክቦ ህለው። እት ውላደት ክምስል ሸአገዩ ዲብ እለ አካን እንዴ መጽአየ ሐኪም ለአወልደን ህለ። እሊ ህዩ እብ ፈድል ረቢ ወእብ ፈድል እለ ዕያደት ቱ። ዮም እት ዓፍዮትነ ወዓፍዮት አጀኒትነ ሰኒ ህሌ። ምናተ ሸወዩ ገሌ ንቁሳት ህለ። ለዕያደት ናይ ነዳፈት እሲት ተአትሐዝዩ ህሌት ምን ወዴነ እግላመ ግሩሽ አትሐዘዩ ወግሩሽ ኢትረክበት ሰበት እሊ እግል ልትርኤ እግልነ፡ አስክ እለ እብ ኬዋቱ ነአነድፈ ለህሌ። እምበልሁመ አጀኒትነ እንዴ ነሰኣነ እስክ ድሪት ንትለኣክ ህሌነ ወዲቡመ ካሬ ሰራይ ይህሰኒ ሰበት እሊ እህትማም እግል ልትህዩበን ወለዲብ እለ ዕያደት ለንቅሰ አድውየት ልግበእ ወመኪነት እሰዓፍ እግል ልትመም እግልነ እትወሴ።



ዓሳታት በሐርነ ነአምር

ኬትባይ ፡ ዐብደላ መሐመድ ሙስ (ወድ-ፋርሕ)

ሐዋናት

ሐዋናት እምብል እንዴ ህሌኑ ዓጭሞታት ለሰም ወዓጭሞታት ለአለም እንዴ ትበህለው እት ክልኦት ዐባይ ክፋላት ልትከፈሉ። ዓጭሞታት ለአለም ሐዋናት፡ መቅደድ ዓጻት አው ዓሙድ አልፍቅሪ ለአለም እት ገብኦ፡ ብዝሐህም ወትዕዮቶም ምነ ለነአሽ አሜቢ አስክ አምኦት ኪ.ግረም ለልትመዘኖ ግዝፍ ወከባደት ማዛን ለመልኮ ቶም። ዓጭሞታት ለሰም ሐዋናት ክምሰለ ስሜቶም ለተሐብሩ፡ ዓጭም ዓጻት ለሰም እት ገብኦ እት ሰቡዕ ክፋላት ዐባይ ልትከፈሉ። ምን እሎም ሰቡዕ ለሰለስ(3) ክፋል ዓሳታት ገብኦ እንዴ ህለው ለአርባዕ (4 ክፋል) ህይ፡ መጥብዩት፡ ሰረይር፡ ሌመት ክምሰልሁመ እት ቀበት ክልኢቱ በህለት እት መራታት፡ አንሃር፡ ኦብሐር፡ ሚሒጣት ወዲብ ምድር ይቡሰ ለነብሮ ቶም። ከእሊ ናይ ዮም ክቱብኑ፡ እብ ክሱሰለ አወል ለዘክርህም ዓጭሞታት ለሰም 3 ክፋል ሐዋናት በህለት ዐሳታት ለከሰሰ ቱ። ዐሳታት ዶል እምብል ሚ ወሚ ከምክም፡ ምን ብዕዳም መክሉቃት እብሚ ልትፈንተው፤ ሽክሎም ወብዝሐህም እክል አይቱ፤ ገርቦም እብሚ ጽበጥ ብኑይቱ፤ መቅደረት ሐመሶቶም ዲብ ማይ አክል አያቱ፤ ሕነ ህይ ዓሰ ከአፎ ነአምሩ፤ ሪሙ ምን ሰጡሕ በሐር አክል አይ ገብኦ፡ ወዓሰ ለኢልትሐረድ እቡ ሰብብ ሚቱ፤ እተ ለልብል ሰኣላት ወዲብ ፍንቲት ክልቀት ዓሳታት ለረከዛ እግል ልግባእ ቱ።

ዓሳታት

ዓሳታት እት ማይ ለነብር፡



እብ ምተሐት ክልኤ መላትሐም ለልትረከብ አንኩክ ለለአተንፍሶ እብ ሽበክት ለሰም፡ ወእገር ለአለም ዲብ ማይ ለነብር ሐዋን እት ገብኦ፡ ዓሳታት ነከክ ለአለም ምናተ ቀርጠጠመ ትሩድ ለሰም፡ ገርቦም እብ ዓጭሞታት ብዘሕ ለትብነ እት ገብኦ፡ ዲብ 3 ክፋላት ዐባይ ልትከፈሉ። ለበዝሐው ምን እሊ ከፈፍል እሊ፡ ደም ብሩድ ለሰም እትገብኦ ሓፋነት ገርቦም ምሰል ለትፈንታ ሓለት ጀው ለልትትቃየር ማክሉቀት ቶም።

እብ ለመድ ወድ ሚን አደም እግለ ገብኦ ልግባእ ዲብ ቀበት መራታት፡ አንሃር፡ ኦብሐር

ወምሒጣት ለነብር ሐዋናት ዓሰ እንዴ ቤለ ሰምዮም ወለአምሮም። እብ ዕልም ሐዋናት ወእብ እክድት ለተ ድራሳት እንረኤ እት ህሌነ ላኪን፡ ኔብራይ ዓሰ(ሐት)፡ አቡሰላሙ፡ ወአሐ በሐር ለልትበህሎ ውላዶም እንዴ ለአጠቡ ለሰዓብ፡ ጋብሌ በሐር ወአርዌ በሐር ለልትበህሎ ሌመት በሐር፡ ከምሰልሁመ እብ አላፍ ለልትዐለሶ ዓጭሞታት ለአለም ሐዋናት፡ ክፋል ናይ እሎም እት ማይ ለነብር ማክሉቃት እት ገብኦ፡ ምሰል ዓሳታት ለኢልትሓብሮ አጅነሰ ሐዋናት በሐር ቶም። ሰበት እሊ ዓሳታት እግለ ዲብ ለዐል ለዘክርህም 3 ክፋላት ባህለት ነከክ ለአለም፡ ገርቦም እብ ቀርጠጠመ ወዐጭሞታት ለትብነው ማክሉቀት ሌጠ ለሽምል ቱ።

ምሰዐል ሰር ለእት ኢዲነ ለነብር ዓጭሞታት ለሰም ሐዋናት ምሰል ዓሳታት ልጸገዎ፡ አስክ ኢሊ ወቅት ቅሩብ ዝያድ 34,000 አጅናሰ ዓሳታት ፍሩጋም ህለው። ምን እሎም ለ27,000 ዓጭሞታት ለሰም፡ 970 ቀርጠጠመ ሌጠ ለሰም ከምሰል ከረ ሻርክ፡ መሸረፈት በሐር ወቺመራን ለልትባህሎ ገብኦ እትህልው፡ ለተርፈው 108 አጅናሰ ዓሳታት ህይ፡ ነከክ ለአለም ክፋል ዓሳታት ክም ሃግ-ፊሽ ወለምፕረይን እንዴ ትበህለው ዲብ ሰለስ ክፋላት ልትከፈሉ።


ጸበጥ ገርብ ዓሰ

ገርብ ዐሰ ምን 70% አስክ 80% ምን ጽበጡ ማይ ከምቱ፡ ምን 15-24% ፕሮቲን፡ ምን 0.2%-22% ሽብሕ ወለተርፈ 1% ህይ፡ ሺተሚናት ወማዓድን ለልትረከብ ዲቡ ክምቱ፡ እብ ለገብኦ ድራሳት ብሐሳት እኩድ ህለ። እሎም ክሎም እት ቀበት ገርብ ዓሰ ለልትረከቦ ጽበጥ እግል ዓፍዮትነ መንፈዐት ዐባይ ክም ቦም፡ ወእብ ፊንቱይ ህይ እብ ጽበጥ ሺታሚን ቢ 12 ወአሚገ 3 ፋቲ አሲድ ወሽብሕ እብ ብዝሐ ለከምክም ጽበጥ ልትረከብ ዲቡ። እሊ በህለት፡ ዓሰ እት ቀበቱ ለህለ ሽብሕ ሐለት ወሐፋነት እግል ለህበኑ እት ቀበት ገርብነ ፕሮቲናት እግል ልትብኔ፡ እግል ተጥዊር ወዐቦት ገርብነ፡ ወለዲብ ገርብነ ለልትረከቦ ሺተሚናት ወማዓድን ምን በረ ገርብነ እግል አተረዶት ዐጭሞታትነ ወአስዑድ መንፈዐት ዐባይ ክምቡ ዕለማእ ሙነት ነብረ ወገርብ ወድ አዳም ለሐብር።

ሽክል ዓሳታት

ዓሳታት እብ ሽክሎም፡ ግዜፎም፡ ለነብር እቱ አካናት ለትፈናተው ቶም። ገሌ ዓሳታት ሳብት ሽክል ገርብ ለሰም እት ገብኦ፡ ከምሰል ሽይጣን ባሓር፡ እመን ዓሰ ወቀወሬዕ ዓሰ ላቶም አጅናሰ ላኪን ዐደድ እሊ ለኢልትሓረኮ ምንማቶም፡ ሓይዋናት ማይ ሌጠ ቶም እንዴ እምቤ ክላሰት እግል ነሀብ እቶም ለልትቀድር ኢኮን።

TYPES OF FISH



ቅያሰ ገርቦም ምን ገብኦ ለነአሽ 8 ሚሊ ሜተር ሪም ለቡ እት ገብኦ፡ ለዐባ ምናም ህይ አስክ 16 መትር ለበጽሕ አስክ ጸዕዳ ሻርክ ለልትመደድ ቱ።

1. መቅደረት ሐመሶት ዓሰ

መቅደረት ሽፋንት ሐመሶት ዓሳታት፡ ምን ዓሰ ዲብ ዓሰ ልትፈናቱ፡ እግል መሰል ቱ። ሳልሞን፡ ወበያድ ለልትበህሎ አጅናሰ ዓሰ ምን 10-አስክ 20 ዕጽፍ ሪም ገርቦም ዲብ



ሓቱ ሳንዩት ሽፋንት ለሰም እት ገብኦ፡ ኢሊ-ዓሳ ወመሸረፈት ባሓር ለልትበህሎ አጅነሰ ህይ፡ ምን ሰር ሪም ገርቦም ወተሐት እት ክል ሳንዩት እግል ለሐምሶ ቀድሮ።

መብዘሐም ዓሳታት እብ ሻከሽኽ ላለአተንፍሶ ምንማቶም፡ ገሌ ነይ ማይ ጥዑም ዓሳታት ምን ድዋራቶም ሃዋእ ነዲፍ በህለት አክሰጅን እንዴ ሰሕበው ለልትነፍዶ፡ ገሌህም ህይ ሽምቤት እብ ተጥዊር ናይ ሽንበእ ዓሳታት እንዴ ትበህሎው እክል-ሕድ ክም ናይ መጥብዩት ወሌመት ምን ጀው ሃዋእ እንዴ ሳሕበው እብ ክልኢቱ ሽንበእም ለአተንፍሶ። ገሌህም ከምሰል ድሙ ዓሳ ላቶም መክሉቃት በሐር እብ ከብዶም አው ህይ፡ እብ አምዓይቶም ለለአተንፍሶም ህለው።

2. ዓሰ እብ ከአፎ ነአምሩ ወሪሙ ምን ሰጡሕ ባሐር ህይ

ዓሰ እብ ክልቀቱ ዲብ ቀበት ገርቡ ክልኦት አሀምየት ዐባይ ለሰም ጃሃዝ ለጸብጠ ምንማቱ፡ ለለአትዐጅብ ጋር ላኪን፡ ለክልኦት አጅህዘት ክል አርትከ ናይ በይኑ ወራት ቡ። ላአወላይ ጅሃዝ፡ ጀህት በሐር አው ኢተይ እንክር በሐር ክም ህለ ሐብሬ ለተአምር እቡ አው ክም ኮምፓስ እንዴ ገብኦ መርበይ ለለሐብር እት ገብኦ፡ አስክ

እክል አይ መትወቃል ምን ቅያሰ ጠፍሐት በሐር ባህለት መትወቃል ወመትደሃር እት በሐር እብ ለከሰሰ፡ ማዕሉማት ወሐብሬ ሳብተት ለትረከብ ምኑ ናይ ጠቢዐት ጀሃዝ ቱ።

ለካልኣይ ጅሃዝ ህይ፡ ለዓሰታት ነሳፊት ሪም ምን ንሳልለ በሐር ለተአምር እቡ ባህለት ምን ንሳል በሐር ገጽ በሐር ወበር አክል አይ ሪም ምን ወአስክ ለትፈርግ እቡ

ወሐብሬ ለትረከብ ምኑ እብ ዓመት ምን በደ እትጃህ ለለሐብር፡ ወምን ጋጽ በረ ምን መሓክር ገርብለ ዓሳታት ለለሐጅብ ወለዳፊዕ ቱ። እሊ ኩሉ እብሚ ጀረ እምቤ ምን ገብኦ ህይ፡ ለዲብ ቀበትለ ገርብለ ዓሰ ለልትረከብ ሕሽኩል ህዋእ በህለት ማሕፈዲት፡ ኩሉ መጫብብ ናይለ ማይ፡ እንዴ በዜሕ አክለ ጌሳኩ ለዓሰት እት ቆሪነ አው እት በሐር ድህርት ተአተጅህ ወኩሉመ ለደቅጥ ናይለ ማይ እንዴ ለሐውን አክለ ጌደሰ ህይ፡ ለዓሰታት እትለ ትወቀለ አውመ ገጽ ለዓል እት ሰጡሕ ናይለ በሐር እንዴ ፈግር ገይሱ።

3. ዓሳ እግል ሚቱ ለኢልትሐረድ፤

ዓሰ ምን በሐር ዶል ነአፈግሩ እንዴ ኢነሐርዱ እንጠብሐ ከነአበሽሉ ወ እ ን በ ል ዑ ። ሲጋሁ ለእምበልዕ ሐዋናት ብዕድ እንዴ ሐረድናሁ እ ም በ ል ዑ ። ከዓሰ እግል ሚ ኢ ል ት ሐ ረ ድ ፤ መዕነት ሕርዶ ህይ ሚቱ፤ ሓይዋን ነሐርድ እንዴ ህሌኑ ለሀደፍለ ሕርዶ፡

እግለ እት ገርቦም ወዲብ ሲጋህም ለልትረከብ ዓፍየት ለአለቡ ደም እብ ወሪድ እግል ልፍገር እንዴ ትባህላ ምንማቱ፡ ዓሳ ላኪን በኑ እግል ሚቱ ለኢልትሐረድ፤ ለልብል ሰኣል እት ረአስኩም መጽእ ገብኦ፤ ለበሊሰ ለራቱዕ ህይ፡ አወል እብ ኩሉ ዳያነት ሽዑብ ዐለም ወዲነ እግል ዓሰ እግል ንሕረድ ለሰሚሕ እግልነ ኢኮን። በህለት እግል ሕርዶ ዐሳታት ማእሙሪን ኢሕነ።

እሊ ግምሽ ኢኮን፡ ሙዕጅዘት አውመ ለለአትፈክር ጋራት፡ እግል ትእመኑ ለኢልትቀድር አምር ምንማቱ፡ ለዓሰታት ምንለ ምን በሐር እት በር ለፈግር ዲቡ ወቅት፡ ለእት ኩሉ ገርቦም ለልትረከብ ደም ዲብ ሽነሽክ ልትጀማዕ። ወእሊ እግል ነአክድ ሐዘነ ምን ገብኦ ህይ፡ ዲብ ዓሰታት ለመይት ዲቡ ወቅት፡ ሐንቱ ክልኤ መላትሐ ለልትረከብ ሻከሽኽ እት ሕብር ቀይሕ ፋቱሕ ልትቀየር እንርእይ። ወእብሊ ምን ክልቀቱ እብ ጠቢዐት ምነ ዶል ለእለ መይታቱ፡ እት ሲጋሁ ወለ ሐቱመ ቅጥረት ምን ደም እት ብዕድ ገርቡ ወሲጋሁ ኢእንረክብ። በህለት ክምሰለ ቁርኣን ከሪም ለዘክረዩ“ ላሕመን ጠሪየን” እብሊ ወላመሰሉ አሰባብ፡ ሕርዶ ዓሳታት ለኢለአትሐዘ ክምቱ ለልትአመር።

4. ዓሰ ምን ክልቀቱ አሮት እትጃህቱ፤

እብ እንክር ብዕድ እት ዓሰታት ለልትረኤ ጋር ምን ለህሌ፡ ዓሰ ምን ክልቀቱ አሮት እትጃህ እንዴ እንቱ ክልቅ ቱ። እሊ በህለት ጋጽ ቀደም ልግባእ ወምን ግራ፡ ዓሳታት እት ሽግዲት ዶል ነኣቱ ሐር እቅባለት አለቡ። ገጽ ቀደም ደጊሽ ለኢትሰረረተ፡ ሐር እግል ለአቅብል ወምነ ክሩይ ዲብ ለህለ ብቅት ሽረክ እግል ልፍገር ኢጀርብ። ሰበት እሊቱ ዓሳታት ዲብ ሽግዲት ዶል ልሸእን እምበል ጸቢጦም ሐል ብዕድ አለቡ። ለነፈር ለጸብጦም ህለ ኖሱ ምነ ሽግዲት ኢባልሐዮም ምን ገብኦ፡ አስክ አርዋሐቱ ትፈግር እተ ሽግዲት ጸነሐኩ። ወእብሊቱ ዲብ ማይ ጥዑም ልግባእ ወእት ኦብሐር ወሚሒጣት፡ እብ ሽበክ ጨቢብ ወገበይ ቀላል ገፊፍ ዓሳታት ለልትቀድር።

ዓማት= ወሳይቅ ውዛረት ርዝቅ በሐር





ዶ/ር ዑመር ዑስማን

ፍሬ ለለሀይብ አትመቃርሐት ወቅት

ወቅት ምህም ክፋል ናይ ክሉ ከፈፍል ሐያት ወድ ሚን ኣድም ቲ። ንኣሸነ፡ ሸበትነ፡ እብርነ፡ ሰሓቅነ ብካይነ፡ ፈርሐትነ፡ ሐዘነ፡ ሸቅልነ፡ ድራሰትነ፡ ተጠውርነ፡ ፈሸልነ ዐውቴነ ወብዕድ ክሉ እት አመቅረሐት ራቴዕ መትነፈያት ወቅት ልተንኩብ። ክል ለተሐልፍ ሳንዓት፡ ልግብእመ መደቂቀት፡ ሳዐት፡ ወሰነት፡ ህተን ክም መፍሁም እግል ዐለቦት ዘበን፡ ወበርናምጅነ እግል ሰርዐት ነፈዐነ ገብእ ልኢኮን እብ ኖሰን ለለአመጸሁ ተቅዩር ሰኒ ይሀለ። አክለ ኢነት ጀዳድ መጸአት ወቅት እብ ኖሱ እግል ልቀይረነ ንትጸበር ገእነ ምን ገብእ ለመጽእ ተቅዩር ናይነ ወክም ምራድነ ኢገብእ። ከምን እሊ ለእንፍህመ ምን ተሀሌ፡ ክል ለተሐልፍ ኢነት ሐቆ ከደምነ እተ፡ ምን ተሐምቅ እሻረት ካድምነ እግል ተአርኢነ ትቀድር ወምሰል ሰበር ፈገሪት ትመጽእ። መትነፈያት ወአመቅረሐት ወቅት እብ ዋጅብ፡ እት ሐያት ክል ነፈር ወለ ካፍየት ሒለት፡ አምር ወተፍኪር ለመልክ ሻብ ህዩ እብ ፍንቱይ ተረቲ ቅያስ አለበ። ከፍሬ ለለሀይብ መትነፈያት ወቅት እብ መተላይ፡ እት ሐያት ምራድነ እግል ንርከብ እሊ ለተሌ ክቱብ

ሰለል ወመቅየሰ ወቅት እግል ለሀሌ እግልከ ለሳዕድ በሰር ቲ። መባጼሕ እምበል ኤታን ወኤታን እምበል መባጽሕ ክም እት ፍገሪት ለኢተሀይብ ክሎሊት ላተ ገበይ ሄረርት ቲ። ኤታን ለአለቡ ሸቅል ትምኔት እንዴ ገእ ተርፍ። ኤታን ናይ ሐጨር፡ ምግባይ ወረዩም እንዴ ትበሀለ ልትካፈል ወእሊ ህዩ እግለ ወቀይ እምበል ጨቅዋ እግል ልሰርገል ሰዴ።

3, አውለውየት ነዘሞት
አውለውየት ነዘሞት ምን ምህም ክፋል አፍገርት ኤታን እት ገብእ፡ ለአግደ፡ ምህም አርካን መባጽሕክ ላቶም ሓጃት እብ ቀደም ትሌ እግል ተአግዴ ለሰዴ በሰር ቲ። አውለውየት እተ ትነዝም እቲ ወቅት፡ በራምጅክ እብ ዋዴሕ ፈተሾት ወእለን ለተልየ አሰእለት እግል ነፍሰክ መትሰኣል ምህም ቲ። እብ ሸፋግ እግል ልትመሞ ለብእቶም ከፈፍል ሸቅል እስዎም ቶም? እግል ሐጨር ወቅት እምበል ተአሰር እግል ልትዐደው (ወቅት ልትቀዩር) እግሎም ለቀድር እስዎም ቶም? ሳምን ወሬሕ ወምለዐሉ እግል ልንሰኣ ለቀድሮ አሸቃል ህዩ አዮም ቶም ወእግልሚ ክምሰልሁ ገአው? እት እንብል ኤታን እግል


ካፈሎት ወዝዮት ዝያድ ኤታንክ ወደሐት። እሊ ናይ ክል ምዕል ክፋል ኤታንክ ህዩ ክል ምዕል እት ሸቅል እንዴ ኢትትፈረር፡ ሚ እግል ልሳድፈኒ ቀድር ወእብ ከአፎ እሊ መጃል እሊ እግል አግዴቱ እት ትብል ወምሴ ምን ሸቅል ክም ሂርከ፡ ለሳደፊክ መታክል ሚ መሰል ወሚ ተጃርብ ረከብክ እብ አስትንተን እግል ንታብዖ ወነአዚዶ ወጅብ።

5, ሰጅል ለትወድዮም ሓጃት አዳላይ

እት አዩ ምዕል ሚ ክም ወዴክ፡ ምሰል ምን ትራከብከ፡ ሚ ነቅሰ ምንከ፡ ለበዘሐ ወቅት አዩ መጃል ነስአዩ ምንክ ሰጅሎት ምህም ቲ። ክእኒ ዶል ትወዴ ወቅት ሓር ነፍሰክ እግል ፈተሾት ሰዴ።

6, እት ሐቲ ወቅት ዎርት ሸቅል ሸቅየት

እት ሐቲ ወቅት ዎርት ሸቅል



ሸቅየት፡ ፍገሪት ለቡ ሸቅል እግል አግደዮት ተረቲ ዐባይ ቲ። ክም ሳዐት ሸቂክ እንዴ ኢገብእ፡ አክልአዩ አፍሬካቱ ለምህም።

ምሰል ነፍሰክ ለተአስተንትን እቲ ወቅት ፈንትተዮት፡ እት ሳምን ምን ልውሕድ፡ ሐቲ ዶል

HOME WORK TIME TABLE		
PRE SCHOOL – PRE PRIMARY		
DAY	WRITING	LEARNING
Monday	English	Maths
Tuesday	Hindi	English
Wednesday	Maths	Hindi
Thursday	Urdu	Maths
Friday	English	Urdu
Saturday	Maths	G.K.

ምሰል ንፍሰክ እግል ተአስተንትን መንፈዐት ዐባይ ቡ። ወለ ከጠርያት ምንመ ሳድፍ እት ኤታንክ ለሀለ በርናምጅ ክመ እለ ህለ እግል ትውደዩ ለስትህል። ምህም ፍሬ ለትረክብ እቲ ወቅት ፈንቲ፡ እትሊ ወቅት እሊ ትሩድ ላቲ ክፋል ሸቅል ወአውለውየት ለልትህዩቡ ሸቅል እብ አግደዮት ወቅት ለለአበዱ ምንክ አሸቃል

አትመሞት ራሐት ደሚር ክም ትረክብ ወዴ። እሊ ሌጠ እንዴ ኢገብእ እብ በርናምጅ ጊሰት፡ እብ ትሉሉይ ለትትነፍዕ እሶም ሓጃት እት ጀፈርክ አጸንሐት፡ ለትትነፈዕ እሶም ሓጃት እት እምር አካን ከሪ፡ እት ክል ምዕል ሐጨር ወቅት ሓጃትክ እግል ነዘሞት ፈንተዮት ወሕድ ለመሰሎ አሸቃል ምሰል ነዘሞት እት አመቅረሐት ወቅት ዐባይ ተረት ቦም።

መዘከሪ አዳለዮት፡ ወወድነ አውረሐት መትነፈያት ኤታንክ እት ዐመል እት ተርጀሞት ቅያስ ለአለበ ሰደይት ለሀይቦ። ድሲፒሊን/አደብ ሀለዮት፡ ዶል ትትዐወት ነፍሰክ ሰጀዖት፡ ናይ መትዐጸጻፍ ቅድረት ብንዩት፡ ትሩዳም አሸቃል እብ ቀድም ሰርዐት፡ ምን መራቀባትክ በሪ ላቶም ሓጃት እሶም እት ተሐሰብ ወቅትክ ኢአብደዮት ምነ ምህም ጽበዋ ፍሬ ለለሀይብ አመቅረሐት ወቅት ቶም።

ሐምሰ ንቃጥ ሕሩይ ብሕሰ እግል ቀደሞት

እት መድረሰት ካልኣይት ደረጃት፡ ኩልያት፡ እት ሸቅልነ ምን ገብእ ወአምዕላይ መንበርነ፡ እግል ሳድፍ መሻክል እግል ባልሐት ወእተ ክምሰልሁመ ሐዲስ ሓጃት እግል አምጸኣት ወጀረቦት ብሕሰ ምህምቲ። ለመብግሳይ ሐዲስ ሓጃት ላቲ ሻብ ህዩ ምለዐል ክሉ ለአትሐዘዩ። ከምን እሊ እንዴ አትሌነ እብ ከአፎ ሕሩይ ብሕሰ እግል ትቀድም ለሰድዩ ዐሰር ንቃጥ ንርኢ።

1. ሀወኖት ድህርት ሰአዩት

እግል ነፍሰክ ትሩድ ወሕሩይ ሸቅል እግል እሸቂቱ እንዴ ትቤ አትአመኖት። ብዘሕ ወቅት ምጅተመዕ፡ ምን ልሙድ ሓጃት ፍግር ለቤለ ፍንቱይ ፍክርያት ወሸቅል ኢልትከበት፡ ደአም ተአሪክ ወአሰር እግል ሕደግ ብእጅ እንዴ ትቤ እብ ክለ ቅድረትክ እግል ሸቅል ትበገሰ።

2. ሐንገልክ አዳልዩ

ብዝሓም አንፋር ዐባዩ ናይ ዕሉም ምህዞ እብ በክት ለመጸ እግል ልምሰሎም ቀድር ምናተ በክት ሐቆ መትብጋስ ክም ህለ እግል ነኣምር ወጅብ። በክት እግል ዱሉይ ወክፋት ምክ ተሐሬ ሰበት ገበኢ።

3. ዕምር ወወቅት ምህም ቶም

አልበርት አንሰታይን ብዘሕ ምን ምህዞ ንኡሽ ዲብ እንቱቱ ለሸቀዩ። እብ ዕሙማይ ህዩ እት ለበዘሐዩ ከፈፍል ናይ ዕሉም ክም ፍዚክስ፡ ኮሚስትሪ ወሕሳብ ብሕሰ ለወዱ ዕለመእ እት ዕምር ንሾም ለበዘሐ ሕሩይ ሸቅል ለአገዱ። እብ ድድ እሊ ህዩ እት ክም ሲያሰት፡ አምር ክቱብ ወቃትን ለበዘሕ ሕሩይ ሸቅሎም ሐቆ ብዘሕ ወቅት ወተጃራብ ቶም ለቀዱሙ።

4. አምር ወሐንገል ሌጠ ካሬ ኢኮን ሐጠርመ ለአትሐዜ

ባሕስ ዕልም ኮምፒተር ሃሚንግ ክመ ቤለዩ ዕወታም ዕለመእ ምን ብዕዳም ለትፈንትዮም ምን ተሀሌ፡ ሓጠራም ወእት መባጥሮም ሳብታም ቶም። ሐጠር ህዩ ለአምነው ወተበገሰው እግለ ሓጀት እብ በታክት እግል ልውደው ሳዕዶም።

5. ራትዕ ወቅት ሸቅል ሀለዮት

ብዝሓም አንፋር እለ እግል እውዴ ሐቆ ገኣኮ፡ ወቅትጅ ክም እሊ እግል ልግበእ ቡ፡ ክም እሊ ሓጃት እግል እርከብ ብዩ እት ልብሎ ወቅት ለለአትራይሞ ወሕሩይ ሸቅል ክሉ ለሐዜካህ ሓጃት ክም ረከብኩቱ ለገብእ ለልብል ኢራቴዕ ፍክር ቦም። ምናተ ለበዘሐ ናይ ፊዚክስ ምህዞ ወብሐሳት እት ወቅት እኩይ ወለኢናሰብ ወቅት ለትሸቀ ክምቱ ሸሬሕ።

ንተበዕ።

1, ዋዴሕ መባጼሕ ሀለዮት

እት ፍክርክ እብ ትሉሉይ ለትዘከርም፡ ፍገሪት እስትንተንክ ወምራድክ ላቶም መባጽሕ እግል ለሀሉ እግልክ ወጅብ። እሊ ሌጠ እንዴ ኢገብእ፡ መባጽሕነ እብ ክቱብ እግል ነኣዳልዮ፡ እብ ትሉሉይ እግል ንርአዩ እት ለእንቀድር እተ አካን እግል ንስቀሎም ወምሰልነ እንዴ ነሰአናሁ እት ለእንገይስ ሰጅል እግል ንክተቦም ለአስትህል።

2, ኤታን አዳለዮት

ኤታን መባጽሕክ እግል ትብጸሕ ለሰዴ፡ እቲ ለተአበጼሕ

ንረዝቅ ወንወዴሕ ለአስትህል።

4, ሰቡረት ፍዕል አዳላይ

ልሰተት ለትወድዮም አሸቃል ላዝም እግል ትዳሌ ቡ። ክሎም እግል ተአግድዮም ለተሐዜ ሓጃት እት ሴር እብ ሰርዐት ምዕልክ እብ ሐትሐቲ ታብዖት ለአትሐዜ። እለ ሰቡረት ፍዕል ወለ ሰሩ ከፈፍል ሸቅልነ ክቡድ ምንመ ገብእ እብ ዋጅብ እግል ልትከተብ ወልትሰረዕ ቡ። ሰቡረት ፍዕል ሌጠ እንዴ ኢገብእ፡ ናይ ክል ምዕል ሰቡረት ለተአገድዮም ሓጃት አዳላዮትመ ላዝም ቲ። ለዐባይ ናይ ክሉ መባጽሕክ ሰቡረት ፍዕል እት ናይ ክል ምዕል ሰቡረት ፍዕል እብ

ልባብ

እብ ከፎ እግል ትትፈቀድ ትፈቱ

ቀደም ምእት ሰነት ገብእ፡ ምሮት እናስ ለናይ አሰቦሕ ጀሪደት እለ ቃሌፅ ዐሉ፡ ከአመተ አለቡ ወሰኒ ድንጋጽ ለገበአት እቱ ጋሪት ሰድፈቲ። ስሙ እተ ከበር ማይታም ለልትነሽር እቱ ዓሙድ አውመ ሰፍሐት ናይለ ጀሪደት ክትብት እት እንተ ረአየ። ለጀሪደት ተቅሪር ናይለ ህቱ ለኢኮን ለሞተ ነፈር እብ ቀለጥ ናሽረት ለዐለት።

እሊ ክም ረአ እት ሰልፍ ምን ቅያስ ወለዐል ድንጋጽ ገብአ እቱ። ምስል ርሐ እት ልተራቀም፣ “ከአነ አዜ እትለ ህሌኮ መ እትሎህ” ቤሉ። ሐር ሐቆ መደቲት ቅሩብ ክም ሮገ ወርሐ ክም ፈረገ፣ እት ለሐሰብ ወአዳም እብ ክሱሱ ሚ ልብሎ ክም ዐለው እግል ለአምር ርሐ እት ፈትሽ አንበተ።

ለከበር ለጀሪደት እተለ ዓሙድለ ማይታም ናሽረቱ ለዐለት ክምእነ ልብል ዐለ፣ “መልክ ዲናሚት ትረሐመ፡ ህቱ እትለ እዲነ እተ ዐለ

እቱ ወቅት ታጅር ናይ ሞት እንዴ ገብአ ሸቄ ዐለ።”

እሊ ነፈር ለከበር ሞቱ እብ ሐያቱ እት እንቱ እትለ ጀሪደት ፋግር ዐሉ፡ ሚህዛይ ናይ ዴናሚት ቱ ለዐሉ፡ ከእግለ “ታጅር ሞት” ትብል ለዐለት ዘዐት ዶል ቀርኡ፡ እግል ርሐ ሰኣል ትሰእለየ፣ “አነ ሐር ለአዳም እብ ክምሰል እለ ለትመሰል ገበይ ቱ ለፈቅዱኒ?”

ወሐቆ እለ ምስል ነፍሱ እት ልትጋሚ ወእብ ቁሪነ እት ለሐሰብ አንበተ፡ ወዲብ እለ እዲነ ሐር እብ ክምሰል እለ ትመሰል ገበይ እግል ልትፈቀድ ክም ኢለሐዜ ቀራር ነሰኡ።

ከምነ ምዕል ለህ ወሐር፡ ጀላብ ሰላም ወደሐን ሌጠ እት ሸቄ አንበተ። እሊ ነፈር እሊ አልፍሬድ ኖቤል ልትበህል፡ አዜ ዲብ እሊ ወቅት እሊ ህቱ እበ ዐባይ ወእምርት ጃእዘት ኖቤል ልትፈቀድ ሀለ።

ከክመ አልፍሬድ ኖቤል ነፍሱ

እንዴ ሓሰቤ፡ እግል ርሐ ምን ሐዲስ እብ ገበይ ሰኔት እግል ለአትአምረ ወለአሰምየ ወእብ ሰኔት ክም ትትፈቀድ እግል ሊደየ ለባሰረ፡ ሕናመ እት ገበይ ሰዋብ እንዴ አቅበልነ ወምሰል ርሕነ እንዴ ትሻወርኹ ክምእለ ናየ እግል ኒዴ ወጅበኹ።

ከሕነ ህዩ ሚ ገብእ አውረሰኹ፡ ወእግል እሊ ምጅተመፅ ለነሐድጉ ሚራስ ህዩ ሚ ገብእ መሰል፡ ወሐር እትለ እዲነ እብ ከፎ እግል ንድፈቀድ ነሐዜ ገብእ?

ከእንተ ህዩ እብ ሰኔት እግል ትትህድግ ተሐዜ ገብእ መኢፋልከ?

እንተ እብ ፈተ ወሕሽመት እግል ትትፈቀድ ቱ ለተሐዜ መኢኮን?

ወለ ክሉ ረአሰከ ስምክ እንዴ ትከሬት እግል ትትረሰፅ ቱ ለተሐዜ?

ለቀራር ናይካ ቱ።

ደለ ገብአት ክለ ክም ጀኔታይ ንኡሽ እንዴ ገብአክ አቅምተ

ምን ኣመረ ለዐበ ምደርስ ናይ አሆታይ ሕሳባት ጀኔታይ ንኡሽ እግል ልግበእ ቀድር። አጀኒት ነኣይሽ ለትወቀለው አሆታያም ሒሰበት ቶም። እለ እዲነ እብ ክል አንክራተ መታክል ወተሐድያት ለትመለአት ክምተ አሰክ እለ አምራም ይህለው። ከእለ እዜ ህቶም ክም ሐቲ ዐባይ ወሐዳስ መካጠረት አውመ ብቆት እንዴ ገብአት ትትረአዮም። ከእንታመ ክም እሊ ናዮም ለመሰል ገበይ ሕሳባት ምን ትተሌ ከፎ ወገብእ መሰለኹ።

እሰኬ እብ ክሱስ ምሮት ምነ ተአምሮም አጀኒት ሕሰብ። ህቱ ምነ ዲብ እለ እዲነ ለሳዱፋ ሐዳይስ ላቶም ጋራት ክሉ ረእሱ ፈርሀት ለአለቡ መሰል፡ ለገብአት እግል ሰልፍ ዶሉ ለልርእየ ሰንዐት ሐቲ ዶል ላዝም እግል ልጀርበ ለሐዜ። እግል እለ እዲነ ፈትየ ወሰኒ መትፌውላይ ወልወቅ ቱ። አጀኒት እለ እዲነ እግል ልፊቱሽ ወልባሐሰ ወእት ቀበተ ለሀለ ክሉ እግል ለአሙሩ ፈቱ። ከረሐም እንዴ ሰበለወ እምበል ፈርሀት እግል ልትመራመሮ ወደለ ሐዲሰት ተ እግል ልጀራርቦ ወልድረሶ ለሐዘ።

አጀኒት ኢፋሉታይ ተየልል ሰድፈዮም ምን ገብእ ኢለአውልጦ ምኑ፡ ሰበቡ ህዩ ለተየልል ገሌ ሰኒ ጋራት ክም ኢለሐግል ሰበት ለአምኖ ቱ። ወዲብ እለ እዲነ ለሀለ ክሉ አከይ ተየልልመ ሐበት ዳልያም እቱ ኢኮን፡ እሊ ህዩ ህቶም እት ሐን ጽላልክ ሰበት ህለው ቱ።

ከእንታመ አክል ሕድ ክመ እሊ ጀኔታይ ንኡሻይ ለወድየ እግል ቲዴ ትላመድ። ከሕኔት ደለ አኬት ሌጠ ትትረኤክ ወምነ

ገጽከ ሐር እት ተሐማጣምጥ ትነብር፡ እት አካነ እግለ ሰንያም ጀዋንብ እግሎም እት ተኣትቃምት አንብት።

እብ ክሱሰለ “ሐቲ ዶል እንዴ በጠርከ እግለ ዕንባባታት ጼኔ ወእሎም ትናሽዕ” ለትብል ዘዐት ሕሰብ። ጀኔታይ ንኡሽ ክምሰልሁቱ ለወዴ፡ እንተ ህዩ? ለአብኹት ክመ እንተ ለትፈትየ ወትትሽነህ ሰበት ኢገብእ፡ እለ ምን ገብእ እንተ ኖሰክ እግል ትብድሎም ትጸገም።

ህድእ በል ወወቅት እንዴ ነሰኣክ እለ እዲናከ ትመተፅ እበ። ለሰኔትለ እዲነ አክል ሕድ አዳውረ ወጠምጠመ ድሌ፡ እተ ዶል ለህ እት ሕቅፍለ አሆታያም ሽነካተ ሌጠ እግል ተኣክርር ቱ።

እሎም ገሌ ምነ አጀኒት ነኣይሽ ለወድዎም ጋራት ቶም፡ ከእንታመ እትለ እዲናከ ትነፈፅ እበም፣ እሎም ጋራት እሎም ሕኔት ለኢፋሉታያም ሽነካት ተኣትቃምት እት አካኖም ለአሆታያም ሽናካት እግል ትርኤ ሰዳይት እግል ልግቦኦ እግልካ ቱ።

1. ሓዳይስ ጋራት አምር፡ ለኢተአምሮም ጋራት ዶል ሳድፋከ ሕኔት ተሀርብ ምኖም

ወግራክ ተሀይቦም አሰኩም ገጽከ አሳድር ወጋብሆም። አጀኒት ነኣይሽ ሓዳይስ ጋራት እተ ሳዱፎም እቱ እዋን፡ እግል ልመርሞሮም ወእግል ልክሾፎም ልትጸገሞ፡ ከእብሊቱ ብዝሕት ሓዲሰት ለልአምሮ። ከእንታመ አዜ ርሕክ ሐዳይስ ጋራት እግል ተአምር መንገአት ፍታሕ እለ።

2. ተሐድያት አውመ መታክል ሳደፈዉክ ምን ገብእ ኢተአወልጥ ምኖም። አጀኒት ነኣይሽ መታክል ሳድፈዮም

ምን ገብእ፡ ሰኒ ወአማን ለሀንድዶም ወለጋሪት ክም ትልህየ አውመ ክም ጌም ልርእወ። ከነፍሰከ ሕኔት መነ ሳዱፈ ተሐድያት ተሀርብ እበ ክም ትጋብሆም ወትትከበቶም ውደየ።

3. ተመህ ውዴ፡ አጀኒት ለእደዮም ቅዱር ቱ፡ ተመህ ልብሎ ወቀዋቅሎ፡ ወደለ እለ

ረአአው እግል ልተማትሞ በህ ልብሎም፡ ወእትለ በዝሐ ወቅት እሊ ተመህ እሊ ዐደድ እግልከ ለለዐይነካመ ኢኮን። አጀኒት ተመህ ለልብሎ እበ ምስምሴ፡ ህቶም እግል ልድረሶ ወልትዐለሞ ሰበት ለሐዘቱ፡ ወእሊ እተ ወዱ እቱ ወቅት እት ቀበትለ ዐመልየት ገሌ ከራብ አው ዐደም ንዛም ትረከበ ምን ገብእ፡ እሊ ብዙሕ አሀምየት ኢለሀየቡ። ከለውቀት ክል ዶል ንዛም አለበ ወቀይዳመ ብቱክ ቱ።

4 እግል ቀዋኒን ባልክ ኢተሀቦም፡ አጀኒት ነኣይሽ እግል ቀዋኒን ክል ዶል ባል ኢኮሩ

እሎም፡ ወእሊ ክል ዶል እት መሻክል ከርዮም፡ ምናተ እትለ በዝሐ ወቅት እት ደንጎበ ለውቀት ወፈያግ ልትሰያም፡ እሊ ህዩ ህቶም ሐቲ እግል ኢለደወ ምንዓም ምነ ለዐለው ጋሪት ሰበት ወደው ቱ። እት ቅብላት ስልጠት ዶል ትብዋር ሰኒ ወአማን ገጸ ቀደም ለትደርክ ሒለት ትመጸኣኩ፡ ከዶልክ ገሌ ገሌ ቀዋኒን እንዴ ሀመልክ ርሕክ ምን ሐዲስ እት ጀኔታይ ንኡሽ እቅብልት ለህሌት እግል ልምሰል እተ በክት ሀበ።

5 አተምሰል፡ ርሕክ ክም ንኡሻይ እግል ትምሰል እግልከ ዶል ተኣትአምኑ፡ እሊ ለዐበ ክፋል ናይ ንኡሻይ ግብኣት ቱ። ለእለ ትወዴ ክለ እት ድዋር አተምሰሎት

ጠዓም

ርሕክ ዐደድ ክሉ ውደየ!

ሕነ ክልነ ሐቲ ሕኩ ገሮብነ ሐቲ መሰል፡ ርሕናመ እተ ክምሰልሁ፡ ወክሎም እት ቀደም ጸገም ለንተበዎም አግቡይ ወለእንወድዮም አብሳራትመ ሕድ መሰሎ ወአክል ሕድ ቶም እንዴ እንቤ ዶል ነሐሰብ፡ ላጋሪት ታፍሀት ወተርጀመት ለአለበ ትመሰል እትነ። ውላድ አደሚ ህዩ እት ርሐም እህትማም እግል ሊደው ወረዓየት ካፍየት እግል ለሆበ ዶል ለሐዘ ብዙሕ ልትሀከው።

ርሕክ ዐደድ ክሉ ወዴካህ ምን ገብእ፡ እሊ ዑፋይ ገሮብ፡ ደማንት እት ነፍሴ ወእትለ ገብአትከ ዕዉት ወስርጉል ክም ትገብእ ወዴኩ። ከእሎም ሰለሰ ጋራት እሎም፡ ነፍሰክ ክመ ለአትሐዜ ሸክል እግል ለአጽቡጠ ካፍያም ምስምስ ክም ቶም ሸክ ለአለቡ እተ አማን ክምተ እግል ተአምር ለአስትህል።

ተበሰም



ምሮት ነፈር ሐቲ ጀሪመት ወደ፡ ሐር እብለ ጀሪመቱ እት ቀደም ቃዲ ክም በዋረ፡ እብ ሽንቆ እግል ልትቀተል ሐክመ እቱ። ህቱ ህዩ ወሪዱ እግል ሐብል ሽንቆ ሕኔት ለሀይብ እብ እዴ ኖሱ ስም እንዴ ሱተ እግል ሊሙት ሰበት ቀረረ፡ ስም ገርደዐ። ለምሕከመት ህዩ እለ ክም ረአው እግል ለአሰዑፋ አሰክ ዕያደት ሰዐው እቡ፡ ወረቢ ሰደዮም ከምን ሞት አድሐነዉ፡ ምናተ ዶል ለእለ ተማም ተዓፋተ ነሰአዉ ወእተ ሐብለ ሽንቆሁ እንዴ ሰቅለዉ ቀትለዉ። ከሞት ለትሰርሩ ምንመ ይዐለት፡ ሽንሀቱ ወምራዱ እግል ኢልርኩብ ሰበት ሐዘው እብ ሽንቆ ቀትለዉ።



ቱ ለትደውር፡ ከመትካያል ህዩ ክል ዶል ምኑ ልጥዕም አለቡ። ርሕክ ምነ ልምድት ገበየ እንዴ አወለሞከ እብ፡ ነፈር ብዕድ አተምሰሉ፡ እተ ዶል ለህ ለጋሪት ብዙሕ እግል ትጥዐም እትካቱ ወሰሕቅ እግል ቲዴ ቱ።

ብዝሓት አግቡይ ህልየ እንዴ ተሌካህን ነፍሰክ ክም ጀኔታይ ንኡሽ እንዴ አተምሰልክ እበን ገጽከ ቀደም አሰክ አሆታይ እትጃህ ፍክር እግል ትጊስ እበን ለትቀድር። ለተልሀው ለህለው አጀኒት አተቃብል። ትም እንዴ ወዴክ ዕፈዮም ወእግለ መዋዲቶም ወለመባልሶም እንዴ አቅመትኩ ምነ ናይ ዐባይ እብ ከፎ ወእብ ሚ ክም ልትፈንተው እት ኖተት ክተቡ። አምዕል እብ ግዲደ

እብ ክሱስ ነኣይሽ ላቶም ጋራት እንዴ ኢልትሐሰሮ ወኢልትሃለጎ ከፎ ክም ለሓሉፈ ረኡ፡ ከእግል ርሕክ ህቶም አማኖም ቱ ሚ መስኡልየት ቦም ለትብል አማን እተ እግል ኢተሀንጦሞለ በክት ኢተሀበ፡ መስኡልየት እብ እንተ ልብ ለኢትከሬ እተ ገበይ አሆታይ እግል ኢትግበእ ገጸ ሐር ትከረዐኹ። ህተ ምስምሰ ሌጠ ቱ፡ ወምስምሰ ህዩ እግለ እንተ እግል ተኣሰሱ ብዙሕ ትትጸገም ለህሌህ አሆታይ እትጃህ ፍክር ለትቀትል ቱ። ልብክ ክሉ እተ መሰል ጀኔታይ ንኡሽ ለትነትል ፍክረትክ ውደዩ፡ ርሕክ ሕርየት ራክበት ክም ህሌት አተሸዕረ ወእግል እለ እዲነ ፍተየ ሌጠ።




ዓ-ዓቶ-ነ ነኢፖር

ምን ሕላይ ሰብ በዲር



ደኣም ልግርዝ ክም ትወለደ
ምነ ክተፋ ሐቲ ምን ትነቅሉ፡ መ
ዕንታት ወአፍ ለአለቡ መ ሀዩ
ክልኦት ረኣሰ ምን ጸኔሕ እቲ እበ
እበ ለአንሰ ቀትልሁ፡ ወእት ምድር
ብዕድ ልትቀበር፡ ወልትመሀለሉ፡
ወኣዳም ክሉ ትክበሉ ወድመ
ወጭግር አሰር፡ እሊ ለመስል
እግል ኢልብዘሕ ወግናይ ትወለደ
ልብሎ፡፡ ወሀዩ ድቃለ አቡሁ
ለኢተአመራመ ምስል እመ
ቀቱሎ፡፡



ጅግረ ዐጃላት ተራፍ እት ገዢባት ጉብኣ



ጅግረ ዐጃላት ወመትፈርጃቱ

ቀደም ሳምን ለአንበተ ጅግረ ዐጃላት አቅሊም ምግብ ለሐልፈት ሰንበት ዐባይ 10 አፕሪል፡ እበ ኩሉ ድሽዝዮናት ለአሻረክ ጅግራታት 'ዘነብ ብተክ' ትሉሉይ ዐለ።

እሊ እት ድዋራት ማይ-ድምነት (ቤት ገርጊስ) ጉብኣ ለሀለ ብድረ ዐጃላት፡ እት ክል ዱረቱ ሽላተ ሰበት ብእቱ 'ዘነብ ብተክ' ዲብ ልትሰሜ፡ መትፈርጃቱ ለረይሐ ጅግረ ዐለ።

ምናተ ናይ ደንጎበ እት ዘነብለ መትጃግረት አክራይ ሽሪዋ ለኬደ መትባድራይ ምን ጅግረ ለፈግር እቱ ጅንስ ጅግረ ዐጃላት ሰበት ቱ፡ እግለ መትባድረት ለልአትሀምል ወወቅት ለልሀይብ ኢኮን።

እትለ ምዕል ህይ፡ 100 ኪሎምትር ዐጃላት እግል ልሰውጎ ለትዳለው 68 ኤሊት መትጃግረት፡ እት ክል ዱረት አሮ መትጃግራይ እት ለሐድጎ እት መጃሚዕ

ትካፈለው። አማንኤል መሓሪ ምን ፈሪቅ ኤራቴል ወዳዊት ሳምኤል ምን ፈሪቅ ደንደን ቀደም ትፈተው።

ብዝሓም እት ፈግሮ ዕልብ መትጃግረት እት ምንተሐት 10 ትካረ። እተ መደወን ካቲመ ለትዘበጠ ዲበ ኢነት ህይ፡ አማንኤል መሓሪ (ኤራቴል) አወላይ እት ፈግር፡ ዳዊት ሳምኤል ምን ደንደን፡ ዩኤል ሀብተኣብ ምን ኤራቴል፡ ሚክኤል ሃብቶም ምን ሰንበል፡ ሚልክያስ ቅዱሴ፡ ሳምሶም ሃብቱ፡ ኤሽን ረዳኦ ወዮናስ ተኪኤ አርብዲቶም ምን አሰቤኩ፡ ሰምኦን ተሰፋጋብር ወናሆም ገዛኢ ክልኢቶም ምን ፈሪቅ ሰምበል ምን 2ይ አሰክ 10ይ ደርብ ሕድ አተው።

27 መትጃግረት ምን አዋልድመ 70 ኪሎ ምትር እተ ትጃግረዩ። ዮም ዓመት ሰኢ እንዴ ትጠወረዩ ለመጽአዩ መትጃግረት ዐጃላት አዋልድ መትፈርጃት ለበሰጠ ዐጃይብ ጅግረ ወደዩ።

እት ደንጎበ ህይ አምዕል እብ ሪመ ዳምቀት ለወዕለት ዳናይት ፍጹም ምን ፈሪቅ ደንደን አወላይት ፈግረት።

ቅሳነት ወልደሚካኤል ምን ሰራይር ሳዋ፡ ሳሮን ተኽሌ፡ ፌሽን ህይሌ ወሚለና ያፌት ሰልሲተን ምን ፈሪቅ አራግ፡ ዮርዳኖስ ርእሶም ምን ደንደን፡ ሮምና ግዑሽ ምን አራግ፡ ድያና ዳዊት ምን ሰራይር ሳዋ፡ ዋናሊዛ አርአያ ምን ፈሪቅ

ግብለት፡ ክምስላሁመ አድያም ዳዊት ምን ደንደን፡ ምን 2ይ-10ይ ተርቲብ ጸብጠዩ።

እብ ክሱሰለ 84 ኪሎምትር ለልሄር 70 መትጃግረት ጁንዳር ውላድ ህይ፡ መትጃግራይ ሚልክያስ ማእከሌ ምን ፈሪቅ አሰቤኩ፡ ደርቡ ናትናኤል አማንኤል ምን ፈሪቅ ግብለት ወሳይሞን ገዛኢ ምን ሰምበል ህይ ምን አወላይ አሰክ ሳልሳይ አተው።



ፕሪመርሊግ ዲብ 32^ይ ሳምንቱ 'ፌሽርፑል ወማንሴቱ እት ጅባት ካሰ ልትሐካቅ'



ሊቨርፑል ወማንሴቱ

ለድቁብ ፍረቅ ብሪጣንዮ - ፕሪመርሊግ ምን ጅምዐት እንዴ አንበተ እትሊ ለሐልፊነ ሰነብትመ ትልሀያታቱ እትሉሉይ ዐለ።

ፕሪመርሊግ እግል ልትመም ወሬሕ ወሰር ታርፋ ዲበ ሀለ እቱ ወቅት፡ ለጅግራታትመ እት ልትደቀብ መጽእ ሀለ። እብሊ ቱ ህይ ገሌሁ ፍረቅ ሰእዮት እት በትክ ወገሌሁ ህይ፡ ለካሰ እግል ልትሀገል ወናይ ምውሰም ሀርመ እግል ልትሰሜ መሀርቱ ሳድድ ለእንርእዩ።

ወእብሊ ኖርዊች-ሲቲ እግል በርንገሊይ 2-0፡ ቶተንሃም እግል አሰዮንቪላ 4-0፡ ሌሴስተር-ሲቲ እግል ክሪስታል-ፓላስ 2-1፡ ብራይተን እግል አርሰናል 2-1፡ ኒውካሰል እግል ዎልቭስ 1-0፡ ኤቨርተን እግል ማንቼስተር ዩናይትድ 1-0፡ ሊድስ እግል ዋትፎርድ 3-0፡ ብሪንጎትፎርድ እግል ዌስትሃም 2-0፡ ወፔልሲ እግል ሳውዛምፕተን 6-0 ቀልበምም።

እትለ ሳምን እምበለ ሀረሚት እሊ ምውሰም 2021/22 ለሀለዩ ማንቼስተር-ሲቲ ወሊቨርፑል



ገብሪኤል ጄሱስ ጎል ተዓድል እት ለኣቲ

ለትዓደለ ፍረቅ ኢዐለዮቱ እግል ኖሱ፡ ለጅግራታት አክል አዩ እት ልትደቀብ መጽእ ክም ሀለ ለወዴሕ ሰመዕ በሲር ቱ።

እተ ኩሉ አዳም ልታከዩ ለዐለ ፍንጌ ሊቨርፑል ወማንቼስተርሲቲ ሰንበት ዐባይ አመቅራብ ለአንበተት ወሐቆ አልዕሽ ለተመት እብ "ግድለ እግል ብሌተ ዮም ዓመት" ለትሰሚት ትልሀዩ ድቅብት፡

መጃገረት ውቅል ወአደብ ኮበሪት፡ ቅድረት ወፈን ትልሀዩ፡ ታክቲክ ወሽዑር ርያደት ለትረኣ እቱ፡ "ምን አልክሳሲኮ" ወለዐል ወሰፍ ምን ለሀሌ ለልአስትሀለ ትልሀዩ ዐለት።

ክልኢቱ ፍረቅ ሕድ ለፈርሀ እት መስል፡ ትልሀዩ አንበተት። ሕድ ዋጠነው፡ ምናተ እት ሐምስ ደቂቀት ምን ጽባቤሕ ጎል ለትበከረ እሎም ኪሸን ዲብሮይኔ ናይ ማንሴቱ ዐለ። ሐቀሁ ዲዮጎ ጆታ ናይ ሊቨርፑል ዲብ 13 ደቂቀት ጎል ሰበት ኣቱ፡ ተዓደለው። ዲብ 37 ደቂቀትመ ማንቼስተር ሲቲ እብ ገብሪኤል ጄሱስ ሰኢ ለትአትዐጅብ ጎል ደግመው፡ ትልሀዩ 2-1 ዕርፍ ማንሴቱ እት መርሐ ፈግረው።

ሐቆ ዕርፍ ለአተላላት ትልሀዩመ፡ ምን ቀደም ዕርፍ



ፔልሲ እት ፈረሕ ቅልብ ሳውዛምፕተን

ለትደቀበ ካልኣይ ሾት ዐለ። መትከባባት ወምልክዮት ኮበሪት ምስል ማንቼስተር-ሲቲ እብ 56 ምእታይት ምንመ ዐለት፡ ሊቨርፑል እግል ልቅለቦ ለልአትትቅድሮም ክወር ሐድ ይኣብደው።

እብ 44 ምእታይት ኮበሪት ለዐለት ምስሎም ሊቨርፑል እት ካልኣይ ሾት ቶም እብ ሴዶ ማኔ እት 46 ደቂቀት ጎል ለደግመው። ረሐም ስተርሊን እት 65 ደቂቀት ለኣተዮ ጎል አፍሳይድ ምንመ ትበሀሉ፡ ብዝሓም መኣይደቱ ለሃረሰ ዐለ። ላኪን ቴክኖሎጂ ኮበሪት (VAR) ስተርሊን ከዋ ሓልፍ ክም ዐለ ፈድሐዩ ክጎሉ አሸጠበ ምኑ።

ወእብሊ ትልሀዩ እብ ተዓድል ክልኢተን ሀረሚት ደርን 2-2 ፈግረት። ቀደም እለ ትልሀዩ ንቀዋ

ማንቼስተርሲቲ 73 ዐለ፡ ሊቨርፑል ህይ 72 ንቅጠት እክእሉል ዐለ። ሰበት እሊ፡ ሊቨርፑል ቃልብ ምንዲ ገብኤ፡ ሚርሐት ፕሪመርሊግ ወሐጠጠ ዐለ። ምናተ እዜመ ሐትሐቱ ንቅጠት እበ ምሩርሓም ሰበት ሀለው፡ 74 ንቅጠት እግል ማንቼስተርሲቲ ወ73 ንቅጠት እግል ሊቨርፑል ክእሉላት ህለዩ።

ካሰ ሀረሚት ፕሪመርሊግ ምን እሎም ክልኣት ፈሪቅ (ሊቨርፑል ወማንቼስተርሲቲ) ክም ኢለሐልፍ ምን ጽባብሐ ቅዩም ሀለ። ምናተ ምን ክም ነስኡ፡ ሐቆ ወሬሕ ወሰር እግል ልትደሌ ቱ።

ክሰቡረት ፕሪመርሊግ እትለ ሳምን ክእነ ትመስል፡-

- ማንሴቲ = 74 ንቅጠት
- ሊቨርፑል = 73 ንቅጠት
- ፔልሲ = 62 ንቅጠት
- ቶተንሃም = 57 ንቅጠት
- አርሰናል = 54 ንቅጠት
- ዌስትሃም = 51 ንቅጠት
- ማንቼስተር = 51 ንቅጠት
- ዎልቭስ = 49 ንቅጠት
- ሌስተርሲቲ = 40 ንቅጠት
- ክ.ፓላስ = 37 ንቅጠት

እብ ሰበትለ ክልኦት ሐርብ እዲነ ሚ ተአምሮ?

እዲነ ምን ትትከለቅ ለትፈናተ አከይ መቅርሕ እት ቀንጽ እት ጽንሕቱ ወልሰሶ ልተላሌ ህለ። እሊ አከይ መቅረሓት እሊ ህይ ሰሩ እንዴ ሸበ ረምሽ ወሰሩመ ዲብ ናይ ሞት ወቅታል ደረጀት እንዴ በጽሐ ኣክረቱ ሐርብ፡ ደማር ወፊነ ገብእ።

አሰባብ ናይለ ትፈናተ አከይ መቅርሕ ህይ አግደ እቅትሳድ እግል ልግበእ አው እብ ሰበብ ምልክ ምሮ እግል ልምለክ ውብዕድ ይእትመለክ አው ይእትሐከም እንዴ ቤለ ፍንጌ ክልኦት መትጻገት ለቀንጽ ነገር አው ደግሸ ቱ። እብሊ ህይ ለክልኦት መትብእሰት አሰክ ሕድ ለአጀግሮ ደም ብዙሕ ዲብ ልትከዔ ደማር ወሞት ዲብ ጀሬ ገይሱ። ዲብ ደንጎበ ህይ ለትቀወተ ዳቅብ ረአሰለ ሐሞን ልትዐወት። አው በዐል ፍቱሕ ረአሰለ ዛልም ወዌራይ ልትዐወት ወካቲመት ትገብእ እግሉ።

እብሊቱ ህይ እትለ ዐለምን ክልኦት ለህይ ከምን ለህይ ለልደቀብ ሕሩባት ለገብእ። እሊ ሕሩባት እሊ ህይ አወላይ ወካልኣይ ሐርብ እዲነ እንዴ ትበህለ ልትአመር። ከሰበብ ናይ እሊ ሕሩባት እሊ ሚ ዐለ ፍንጌ ምን ወምን ወክል ምኑ እግል መደት ከም ሰነት አተላለ ወከም አዳም አፍነ እት ልብል ሰኣል በለሰ ምህምቱ። ለክልኦት ሐርብ እዲነ አወላይ ወካልኣይ ልትበህሉ።

አወላይ ሐርብ እዲነ
አወላይ ሐርብ እዲነ እብ ሰበብ ቀትል ምሮ ኣርኽዱክ ፍራንዝ ፊርድናንድ (Archduke Franz Ferdinand) ለልትበህል ወድ አውሰትርየ ዲብ መዲነት ሰራዊሽ ሰርብየ እብለ እት ወክድ ለህይ



ለዐለ ሕክም ክምሰል ጀረ ለቀንጽ ቱ። እሊ ነፈር እሊ ለትቀተለ እቡ ሰበብ ህይ መኣይድ አው እህትማሙ እብ ሰበት ሕርየት ሴርብየ ሰበት ዐላቱ። እብሊ ህይ ዲብ ዮም 28 ጁላይ 1914 ህይ አውትሰርየ ወምንጋሪ ድድ እሊ ግዛም እሊ ወሰብ ገለዱ ሐርብ ዐለነዩ። ወለሐርብ ምን ሰርብየ እንዴ ሐልፈ ዲብ ክለ አርብ ዲብ ልልዔ አዳም ብዙሕ አፍነ ወእግል መደት 4 ሰነት በህለት አሰክ 11 ኖቨምበር 1918 አተላለ።


ዲብ አወላይ ሐርብ እዲነ ዝያደት ድቅብት ዲብ እንተ ለፈግረት ደውለት ጀርመን ዐለት። ጀርመን እት ወክድ ለህይ እብ እቅትሳድ ልግበእ ወሰናዐት



ለጠወረት ዐለት ሌጠ እንዴ ኢትገብእ። እበ ዐለ እለ ርዝቅ ምክሕት ዐለት። ዲብ አወላይ ሐርብ እዲነ ዝያደት ሞያራት ሐርብ ትትነፈሶ ለዐለት መ ጀርመን ቱ። እትሊ ሐርብ እሊ ለተዐወተየ ድወል ገለድ ገበኣ እት ህለየ ዲቡ ለጀረ ፊነ ህይ 8.5 ሚልዮን አዳም እት ሐርብ ከምደ።

እትሊ ሐርብ እሊ ዝያደት ለተኣዜት ደውለት ህይ እትሓድ ሶቬት ቱ። ምን 900,000 አሰክ 2.500,000 አልፍ አዳም ከሰረት።

ሰበት እሊ አወላይ ሐርብ እዲነ እብ ሰበት ቀትል ምሮ ነፈር ዲብ ሰራዊሽ ሴርብየ ቀንጽ



ወዝያድ 8 ሚልዮን አዳም እንዴ አፍነ አኽተመ። እምበል መክሰብ አኽተመ።


ካልኣይ ሐርብ እዲነ ህይ?
እሊ ሐርብ እሊመ እብ ሰበብ ወራር ጀርመን እግል ፖላንደ ፍንጌ ጀርመን ወሴድየተ እበ ምሮ

56 ሚልዮን ዱቅሪ እት ሐርብ ምን ሻረከው ለሞተው እት ገበኣ። ለምን 19-28 ሚልዮን ህይ እብ ወለት ገበይ ለሐርብ እበ ሰበብ መትሸዕታር ወዕጾ ለሞተው ቶም። እትሊ እት ካልኣይ ሐርብ እዲነመ ዝያደት ለተኣዜት ደውለት እትሓድ ሶቬት ቱ። አሰክ 14 ሚልዮን አዳም ህይ ከሰረት። መስኡልየት ናይ ካልኣይ ሐርብ እዲነ ለረፍዐው ሂትለር ናይ ጀርመን ወሞሶሊኒ ናይ ኢጣልያቶም። ዲብ ደንጎበ ክምሰል ትፈለለው ኢጣልየ ዲብ 13 ኣክቶበር 1943 ምን መሰንየተ ጀርመን እንዴ ትፈንቴት ዲብ ድወል ገለድ ትጸገዐት።

ሰበት እሊ አወላይ ሐርብ እዲነ ምን 1914-1918 እግል አርበዕ ሰነት ለአተላሌ ዲብ ህለ። ካልኣይ ሐርብ እዲነ ህይ ምን 1928-1945 እግል መደት 6 ሰነት አተላለ። እሊ ሐርብ እሊ ህይ ለደቀበ ዐስከርያይ ሐርብ ዲብ ታሪክ ወድ ሚን ኣደም ቱ።

በህል እ'ሙራም

አሰካር ሞይልድ (ሙኣልፋይ ወኬትባይ መሰረሕያት ወሻዕር ቱ) ከእሊ ተሌ ገሌ ምን መባልሱ ቱ።



- ሰብ ተብዕን ምን ተዐበት እግል ልህረሶ እንዴ ቤለው ቱ ለልህዱ። አንስ ህይ እግል ለኣምረ ወልድለየ እንዴ ቤለያ ቱ ለልትህደየ። ምናተ እት ደንጎበ ክልኡቶም ሰእየት በትተ።

- አናንዮት ለነፈር እበ ህቱ ሐዝዩ ገበይ ነብር በህለት ኢኮን። ብዕዳም እበ ህቱ ለልሐዝዩ ገበይ ዶል ነብር ቱ።

- እግል ውላድ ኣደሚ ለኣማን እግል ተአሰእሉም ዶል ሐዘክ ክም ልትሰሐቅ ውደየም። ወእለ ለሰረረተ እግል ልቅተሉካ ቱ።

- ምን ቅራኣት ኣክትበት በጠርኩ። እት ዶል ለሃቱ ህተ ምን ነፍሰይ እትሻቀል እበ ክም ዐልኮ

ለፈሀም፡፡
- ቀደም እለ ኣነ ሐቱ ዶል ምን ሕክምን መጃኒን ሞሩዝ ህሌኩ። ሰበቡ ህይ እብ ሰበብይ እቱ ለዐለው ብዕዳም ዐያየን እት ሀመት ሰበት ትካረው ቱ።

- ለገብኣ ሰኣል ክልኦት ጃንብ በ፡ ለምሮቶም ለናዩ ጃንብ ገብእ እት ህለ ለምሮት ህይ ለቀልሞ ጃንብ ቱ።

- ፍንጌ ዲሙቅራሞዩን ወጀምሁርዩን ለህለ ምሮት ፈርግ። ዲሙቅራሞዩን እግላመ ሓግላም ፋሰዳም እግል ልግቦኣ በክት ሰበት ለህዩም ቱ።

- ለተአመሞሞ ለኣተ ህሊክ ሓለት እንዴ ኢትገብእ። ሎህ ለእግል ትግበኣ ለኢትቀድር ሓለት ቱ።

- ፍንጌ ዐቅል ወመዕየን ሐዌናይ ክርፍ ህለ። ኣነ ህይ እግል እሊ ክርፍ እሊ ሸንኬክም።

- ኣነ ዐደድ እለ ምተሞዴዕ የኣነ። ተሞዴዕመ ወዴኮ ምን ገብእ ዐደድለ መሞህብይ ለጠልባሁ ሌጣ ቱ።

- ለውቀት ለልትጀረብ ጋር ኢኮን። ህተ ለትትፈቀድ ጋሪት ቱ።

የሰፍ እድሪስ አሚር

ፍንቲት ሰወር ሕዜ



ሳድሰ ወራር እብ ካርቱን

እብ መኻተዕ ገልፋ ለገብገሳ ሌሃሮ ክምሳል ኬፕሳ፡ ለሓም ኦ ቃዕዳት ስህለት ውቃው፡ ናደው፡ መብርቅ ወ መካፎ እግል ህጽዓት ጀገብ ግል ልዳገያ ጉዞምር ሓገፊው ይበን።

